



無錫金匱縣志


卷之三十

世冢  
宦望

名宦  
牧令  
姦職

丞倅  
尉尉

ル 5  
3047  
8



門ル6  
號3000  
卷8

門ル6  
號2300  
卷8

門ル5  
號3047  
卷8

無錫金匱縣志卷十八

世家

自端委開吳而無錫實為都邑迄今數千年來梅李之  
墟皇山之壤其遺迹猶有存者太史公作世家冠以吳  
泰伯遐哉至德弗可尚矣茲從舊志具錄史文無可節  
亦不敢贅也志世家第二十

吳泰伯泰伯弟仲雍皆周大王之子而王季歷之兄也季  
歷賢而有聖子昌大王欲立季歷以及昌於是泰伯仲  
雍二人乃犇荆蠻文身斷髮示不可用以避季歷季歷  
果立是為王季而昌為文王泰伯之犇荆蠻自號句吳

昭和  
六月十八日  
東

荆蠻義之從而歸之千餘家立爲吳泰伯泰伯卒無子弟仲雍立是爲吳仲雍仲雍卒子季簡立季簡卒子叔達立叔達卒子周章立是時周武王克殷求泰伯仲雍之後得周章周章已君吳因而封之乃封周章弟虞仲於周之北故夏墟是爲虞仲列爲諸侯周章卒子熊遂立熊遂卒子柯相立柯相卒子彊鳩夷立彊鳩夷卒子餘橋疑吾立餘橋疑吾卒子柯盧立柯盧卒子周繇立周繇卒子屈羽立屈羽卒子夷吾立夷吾卒子禽處立禽處卒子轉立轉卒子頗高立頗高卒子句卑立是時晉獻公滅周北虞公以開晉伐虢也句卑卒子去齊立去齊卒子壽夢立壽夢立而吳始益大稱王自泰伯作吳五世而武王克殷封其後爲二其一虞在中國其一吳在彝蠻十二世而晉滅中國之虞中國之虞滅二世而彝蠻之吳興大凡從泰伯至壽夢十九世王壽夢二年楚之亡大夫申公巫臣怨楚將子反而犇晉自晉使吳教吳用兵乘車令其子爲吳行人吳於是始通於中國吳伐楚十六年楚共王伐吳至衡山二十五年王壽夢卒壽夢有子四人長曰諸樊次曰餘祭次曰餘昧次曰季札季札賢而壽夢欲立之季札讓不可於是乃立長子諸樊攝行事當國王諸樊元年諸樊已除喪讓位

季札季札謝曰曹宣公之卒也諸侯與曹人不義曹君將立子臧子臧去之以成曹君君子曰能守節矣君義嗣誰敢干君有國非吾節也札雖不才願附於子臧之義吳人固立季札季札棄其室而耕乃舍之秋吳伐楚楚敗我師四年晉平公初立十三年王諸樊卒有命授弟餘祭欲傳以次必致國於季札而止以稱先王壽夢之意且嘉季札之義兄弟皆欲致國令以漸至焉季札封於延陵故號曰延陵季子王餘祭三年齊相慶封有罪自齊來犇吳吳子慶封朱方之縣以爲奉邑以女妻之富於在齊四年吳使季札聘於魯請觀周樂爲歌周

南召南曰美哉始基之矣猶未也然勤而不怨歌邶鄘衛曰美哉淵乎憂而不困者也吾聞衛康叔武公之德如是是其衛風乎歌王曰美哉思而不懼其周之東乎歌鄭曰其細已甚民不堪也是其先亡乎歌齊曰美哉泱泱乎大風也哉表東海者其太公乎國未可量也歌豳曰美哉蕩蕩乎樂而不淫其周公之東乎歌秦曰此之謂夏聲夫能夏則大大之至也其周之舊乎歌魏曰美哉風風乎大而婉儉而易行以德輔此則盟主也歌唐曰思深哉其有陶唐氏之遺風乎不然何憂之遠也非令德之後誰能若是歌陳曰國無主其能久乎自鄆

以下無譏焉歌小雅曰美哉思而不貳怨而不言其周德之衰乎猶有先王之遺民也歌大雅曰廣哉熙熙乎曲而有直體其文王之德乎歌頌曰至矣哉直而不倨曲而不詘近而不偏遠而不攜遷而不淫復而不厭哀而不愁樂而不荒用而不匱廣而不宣施而不費取而不貪處而不底行而不流五聲和八風平節有度守有序盛德之所同也見舞象箛南籥者曰美哉猶有憾見舞大武曰美哉周之盛也其若此乎見舞韶濩者曰聖人之宏也猶有慚德聖人之難也見舞大夏曰美哉勤而不德非禹其誰能及之見舞招箛者曰德至矣哉大

矣如天之無不燾也如地之無不載也雖甚盛德無以加矣觀止矣若有他樂吾不敢觀去魯遂使齊說晏平仲曰子速納邑與政無邑無政乃免於難齊國之政將有所歸未得所歸難未息也故晏子因陳桓子以納政與邑是以免於樂高之難去齊使於鄭見子產如舊交謂子產曰鄭之執政侈難將至矣政必及子子爲政慎以禮不然鄭國將敗去鄭適衛說蘧瑗史狗史鰭公子荆公叔發公子朝曰衛多君子未有患也自衛如晉將舍於宿聞鐘聲曰異哉吾聞之辯而不德必加於戮夫子獲罪於君以在此懼猶不足而又可以畔乎夫子之

在此猶燕之巢於幕也君在殯而可以樂乎遂去之女  
子聞之終身不聽琴瑟適晉說趙文子韓宣子魏獻子  
曰晉國其萃於三家乎將去謂叔向曰吾子勉之君侈  
而多良大夫皆富政將在三家吾子直必思自免於難  
季札之初使北過徐君徐君好季札劍口弗敢言季札  
心知之爲使上國未獻還至徐徐君已死於是乃解其  
寶劍繫之徐君冢樹而去從者曰徐君已死尙誰予乎  
季子曰不然始吾心已許之豈以死倍吾心哉七年楚  
公子圍弒其王夾敖而代立是爲靈王十年楚靈王會  
諸侯而以伐吳之朱方以誅齊慶封吳亦攻楚取三邑

而去十一年楚伐吳至雩婁十二年楚復來伐次於乾  
谿楚師敗走十七年王餘祭卒弟餘昧立王餘昧二年  
楚公子棄疾弒其君靈王代立焉四年王餘昧卒欲授  
弟季札季札讓逃去於是吳人曰先王有命兄卒弟代  
立必致季子季子今逃位則王餘昧後立今卒其子當  
代乃立王餘昧之子僚爲王王僚二年公子光伐楚敗  
而亡王舟光懼襲楚復得王舟而還五年楚之亡臣伍  
子胥來奔公子光客之公子光者王諸樊之子也常以  
爲吾父兄弟四人當傳至季子季子卽不受國光父先  
立卽不傳季子光當立陰納賢士欲以襲王僚八年吳

使公子光伐楚敗楚師迎楚故太子建母於居巢以歸  
因北伐敗陳蔡之師九年公子光伐楚拔居巢鍾離初  
楚邊邑卑梁氏之處女與吳邊邑之女爭桑二女家怒  
相滅兩國邊邑長聞之怒而相攻滅吳之邊邑吳王怒  
故遂伐楚取兩都而去伍子胥之初犇吳說吳王僚以  
伐楚之利公子光曰胥之父兄爲僇於楚欲自報其仇  
耳未見其利於是伍員知光有他志乃求勇士專諸見  
之光光喜乃客伍子胥子胥退而耕於野以待專諸之  
事十二年冬楚平王卒十三年春吳欲因楚喪而伐之  
使公子蓋餘燭庸以兵圍楚之六濳使季札於晉以觀

諸侯之變楚發兵絕吳兵後吳兵不得還於是吳公子  
光曰此時不可失也告專諸曰不索何獲我真王嗣當  
立吾欲求之季子雖至不吾廢也專諸曰王僚可殺也  
母老子弱而兩公子將兵攻楚楚絕其路方今吳外困  
於楚而內空無骨鯁之臣是無奈我何光曰我身子之  
身也四月丙子光伏甲士於窟室而謁王僚飲王僚使  
兵陳於道自王宮至光之家門階戶席皆王僚之親也  
人夾持鉞公子光佯爲足疾入於窟室使專諸置匕首  
於炙魚之中以進食手匕首刺王僚鉞交於匈遂殺王  
僚公子光竟代立爲王是爲吳王闔廬闔廬乃以專諸

子爲卿季子至曰苟先君無廢祀民人無廢主社稷有奉乃吾君也吾敢誰怨乎哀死事生以待天命非我生亂立者從之先人之道也復命哭僚墓復位而待吳公子燭庸蓋餘二人將兵遇圍於楚者聞公子光弑王僚自立乃以其兵降楚楚封之於舒王闔廬元年舉伍子胥爲行人而與謀國事楚誅伯州犁其孫伯嚭亡犇吳吳以爲大夫三年吳王闔廬與子胥伯嚭將兵伐楚拔舒殺吳亡將二公子光謀欲入郢將軍孫武曰民勞未可待之四年伐楚取六與濞五年伐越敗之六年楚使子常囊瓦伐吳吳迎而擊之大敗楚軍於豫章取楚之

居巢而還九年吳王闔廬謂伍子胥孫武曰始子之言郢未可入今果如何二子對曰楚將子常貪而唐蔡皆怨之王必欲大伐必得唐蔡乃可闔廬從之悉興師與唐蔡西伐楚至於漢水楚亦發兵拒吳夾水陳吳王闔廬弟夫槩欲戰闔廬弗許夫槩曰王已屬臣兵兵以利爲上尙何待焉遂以其部五千人襲冒楚楚兵大敗走於是吳王遂縱兵追之比至郢五戰楚五敗楚昭王亡出郢犇鄖鄖公弟欲弑昭王昭王與鄖公犇隨而吳兵遂入郢子胥伯嚭鞭平王之尸以報父讎十年春越聞吳王之在郢國空乃伐吳吳使別兵擊越楚告急秦秦



遣兵救楚擊吳吳師敗闔廬弟夫槩見秦越交敗吳吳王畱楚不去夫槩亡歸吳而自立爲吳王闔廬聞之乃引兵歸攻夫槩夫槩敗奔楚楚昭王乃得以九月復入郢而封夫槩於堂谿爲堂谿氏十一年吳王使太子夫差伐楚取番楚恐而去郢徙都十五年孔子相魯十九年夏吳伐越越王句踐迎擊之構李越使死士挑戰三行造吳師呼自剄吳師觀之越因伐吳敗之姑蘇傷吳王闔廬指軍卻七里吳王病傷而死闔廬使立太子夫差謂曰汝而忘句踐殺爾父乎對曰不敢三年乃報越王夫差元年以大夫伯嚭爲太宰習戰射常以報越爲

志二年吳王悉精兵以伐越敗之夫椒報姑蘇也越王句踐乃以甲兵五千人棲於會稽使大夫種因吳太宰嚭而行成請委國爲臣妾吳王將許之伍子胥諫曰昔有過氏殺斟灌以伐斟尋滅夏后帝相帝相之妃后緡方娠逃於有仍而生少康少康爲有仍牧正有過又欲殺少康少康奔有虞有虞思夏德於是妻之以二女而邑之於綸有田一成有眾一旅後遂收夏眾撫其官職使人誘之遂滅有過氏復禹之績祀夏配天不失舊物今吳不如有過之疆而句踐大於少康今不因此而滅之又將寬之不亦難乎且句踐爲人能辛苦今不滅後

必悔之吳王不聽聽太宰嚭卒許越平與盟而罷兵去  
七年吳王夫差聞齊景公死而大臣爭寵新君弱乃興  
師北伐齊子胥諫曰越王句踐食不重味衣不重采弔  
死問疾且欲有所用其眾此人不死必爲吳患今越在  
腹心疾而王不先而務齊不亦謬乎吳王不聽遂北伐  
齊敗齊師於艾陵至緡召魯哀公而徵百牢季康子使  
子貢以周禮說太宰嚭乃得止因畱略地於齊魯之南  
九年爲騶伐魯至與魯盟乃去十年因伐齊而歸十一  
年復北伐齊越王句踐率其眾以朝吳厚獻遺之吳王  
喜惟子胥懼曰是棄吳也諫曰越在腹心今得志於齊

猶石田無所用且盤庚之誥有顛越勿遺商之以興吳  
王不聽使子胥於齊子胥屬其子於齊鮑氏還報吳王  
吳王聞之大怒賜子胥屬鏹之劍以死將死曰樹吾墓  
上以梓令可爲器抉吾眼置之吳東門以觀越之滅吳  
也齊鮑氏弑齊悼公吳王聞之哭於軍門外三日乃從  
海上攻齊齊人敗吳吳王乃引兵歸十三年吳召魯衛  
之君會於橐皋十四年春吳王北會諸侯於黃池欲霸  
中國以全周室六月戊子越王句踐伐吳乙酉越五千  
人與吳戰丙戌虜吳太子友丁亥八吳吳人告敗於王  
夫差夫差惡其聞也或泄其語吳王怒斬七人於幕下

七月辛丑吳王與晉定公爭長吳王曰於周室我爲長  
晉定公曰於姬姓我爲伯趙鞅怒將伐吳乃長晉定公  
吳王已盟與晉別欲伐宋太宰嚭曰可勝而不能居也  
乃引兵歸國國亡太子內空王居外久士皆罷敝於是  
乃使厚幣以與越平十五年齊田常殺簡公十八年越  
益彊越王句踐率兵使伐吳敗吳師於笠澤楚滅陳二  
十年越王句踐復伐吳二十一年遂圍吳二十三年十  
一月丁卯越敗吳越王句踐欲遷吳王夫差於甬東予  
百家居之吳王曰孤老矣不能事君王也吾悔不用子  
胥之言自令陷此遂自剄死越王滅吳誅太宰嚭以爲

不忠而歸太史公曰孔子言秦伯可謂至德矣三以天  
下讓民無得而稱焉余讀春秋古文乃知中國之虞與  
荆蠻句吳兄弟也延陵季子之仁心慕義無窮見微而  
知清濁嗚呼又何其閱覽博物君子也

名宦

漢重令長之選晉宋間猶有不經宰縣不得入為台郎之制近代則稍輕矣然其為親民官而一方休戚之所繫職固未嘗異也錫之賢令若王其勤劉五緯為德最鉅歌思至今厥後吳興祚政成於久任而武承謨在官止數十日迹其治行雖古良吏奚愧焉詩曰豈弟君子民之父母朱邑有言後世子孫奉嘗我不如桐鄉民夫亦視其所被而已志名宦第二十一

漢

陶穀字秀實錢塘人有道術漢末隱五部湖時大旱蝗太

守奉印綬請爲無錫令穀退而歎曰郡界有災安得懷  
道而不救到城修六事行弭災之術三日雨蝗盡死穀  
迺逝去

案識小錄云干寶搜神記載何敞事與梁載言十道志  
陶穀事絕相類穀事在漢末敞事記於後漢諒輔之後  
徐詡之前則亦在漢季可知蓋一事而記載互異耳干  
寶晉人梁載言唐人晉漢時近似較可信不應舍敞而  
錄穀其說頗當茲以舊志  
相沿姑仍之而錄此備參

唐

敬澄字深源爲無錫令施設有方百姓歌之與陸羽同時  
因以其餘力疏泉引瀑增山川之勝

宋

焦干之字伯強丹徒人歐陽修門下士嘉祐中舉行誼賜  
出身爲國子直講熙寧六年知無錫縣天旱河水盡竭  
干之設法盡灌輸之宜歲以不饑子孫因畱家焉今新  
安鄉有焦莊

趙伾字義夫洛陽人元符三年知無錫縣遇事敢爲不畏  
強禦人號爲趙鐵頭興創廨舍農田水利無不振舉手  
種長松於惠山寺路旁後人因呼趙令松

郝漸字子進建炎元年知無錫縣會叛兵破嘉禾松江旣  
而襲蘇州勢將及境時外無城堞內無守備漸乃罄家  
資并括帑藏合二千金身與盟於南郊使釋甲受犒而

去邑得安堵民爲樹遺愛坊

任讜建炎二年二月高宗從揚州避兵南下過邑境讜時知縣事供辦整肅帝甚稱獎時事起倉卒軍士無復紀律所過殘毀獨讜制馭有方市不易肆兵無譁者

趙崇要字履簡鄱陽人汝愚第七子官宣教郎嘉定七年

知無錫縣明敏簡靜邑人稱之舊志誤從識小錄作崇簡字履要今據學碑改

阮應得字正已德祐元年三月甲戌元兵至無錫應得時知縣事竭力捍禦城陷率兵巷戰一軍皆沒應得抱縣印赴西濠溺死其子從焉祀名宦

元

道童高昌人自號石巖以世胄入官延祐中由中書舍人

遷無錫州達魯花赤沈毅寡言有威惠後官江西行省

平章政事陳友諒攻江西城陷退保撫州追者至道童

渡水迎戰死之諡忠烈元史有傳作道童注云原作道童

董守思字仲良洛陽人元統間知州修建堂廡門庫無不整備而自處貧薄妻子至衣食不給嘗客至無茶以水滸芝蔴而啜之民爲之作謠

干文傳字壽道平江人延祐二年乙科尹長洲創行助役法凡民田百畝令以三畝入官爲受役者之助行省以無錫州事委焉文傳諭豪家大姓以腴田來歸自是中

人之家不病役歷官尚書所至有古循吏風元史有傳

**明**

韓約字博文東阿人由儒士知縣事有文學好賢禮士毀淫祠興學校居官甚貧與董守思並稱當元運初革鄉邑兵亂人無固志有典史蘇澤者首先入縣與約同設法守禦賊平後約以功擢知通州嘗入朝帝慰勞之約奏曰非典史蘇某之力不及此乃皆遷擢有差約終保定知府祀名宦

趙次進字孝禮臨海人洪武末任本縣丞以平盜功擢知縣縣豈弟敦厚明達治體仕終太僕寺卿

盧克敏字功甫蒲州人永樂中以湖廣都司斷事擢知縣事申雪冤獄人稱明斷

唐泰安字循理零陵人宣德中由驛丞擢任興廢起敝勤敏有才縣署學宮皆撤新之問世贊對自守

項丕字如僉瑞安人進士正統元年任善屬文明恕強直有才力嘗逮繫京師人勸宜異以免禍丕毅然不動事

白還官正統末致事去民樹碑歌思之祀名宦

譚清字廉夫巴縣人國子生正統十三年任性篤實有豈弟風重名教喜詩畫能書舊譙樓署書是其筆卒於官

名宦

顏肅字兆舉廬陵人景泰五年由臨清改任廉謹自持政

無錫金匱縣志

卷十八

名宦

無錫金匱縣志 卷十八  
尚寬簡以憂去

賴瑛字文玉任邱人成化間任能發姦摘伏終高郵知州  
李恭字思敬遼陽人進士成化七年任多惠政陞太僕丞  
未赴卒其妻盧氏截耳納棺中以殮

佟珍字時貴定遼衛人進士成化間任有遺愛在人擢吏

部主事終嘉興知府

祀名宦

徐銳字鈍之永年人進士宏治間任質樸自守

姜文魁字士元進賢人進士宏治間任平易愛民以清節  
著累遷延平知府

侯位字世卿平溪衛人進士正德中任力學好古惠澤及

人有古循吏風擢監察御史

暢華字子實隴西人進士正德十四年任當官清慎嘉靖  
元年八覲諸邑紳餞之泉上分體賦詩贈行邵文莊寶  
序之

鄧繼曾字士魯資縣人進士嘉靖中由給事中左遷無錫  
知縣縣故無官布宜興知縣丁謹欲均派銀一千六百  
有奇繼曾與謹鎖項詣府爭之乃已又嘗仿巡撫周文  
襄忱法重修圩隄民德之肖像祀之芙蓉圩文襄祠右  
鄭普字汝德南安人進士嘉靖中任爲治清明民不敢欺  
萬虞愷字懋卿南昌人進士嘉靖十七年任振起文學勤



敏有立操時徭役不均避匿者多虞愷於里老庭謁時卒令書其大姓差等皆不敢隱乃按籍役之又作十段冊人皆以為便主簿某廉而巡按御史受讒將以墨論虞愷爭不得則正色曰公如念百姓則簿廉宜留苟以讒謂令實私簿無甯黜令解印綬置之庭下而出簿遂以全仕終刑部右侍郎

祀名宦

喻希學字乃來光山人進士嘉靖中任清簡不苛歲饑府有所行不應檄讓之希學報饑僅頻仍父子相食富獲罪不能從公困民未幾去行李蕭然

郭邦光字元實萬曆志作元寶冠縣人進士嘉靖中任廉介有剽

割才擢南京戶部主事

王其勤字時敏松滋人進士嘉靖三十二年任倭躡江南無錫城久廢民情洶洶將潰其勤至官之三日即召父老謀築城令仕宦之家與百姓分任版鍤而身自率之三月城成倭突至登陴固守邑竟以全當是時邑中田賦積為叢姦之藪至有田者不盡出賦而出賦者不必有田其勤迺履畝丈量釐正其稅數千石遺愛至今不

衰祀名宦

案築城禦倭在嘉靖三十三年別詳於行義張守經傳下舊志於守經傳稱三十五年此又屬三十二年皆誤如謂謀事於三十二年莅任之初興築於三十三年寇警之際則傳中既未明言且考修城記及高忠憲王侯

祠引當時此役實出於嚴督促限未聞謀定而復遷延逾年而始興工也故知其勤莅任亦在三十二年惟舊志相沿傳表皆合姑仍之而附辨焉

甄津字汝問魚臺人進士嘉靖中任樂易近人民亦親而

愛之祀名

鄒墀字朝卿餘姚人進士隆慶中任有冰檠之操喜怒不形仕終廣西布政

周邦傑字英甫臨川人進士隆慶五年任身不勝衣言若不能出口而臨事鋒剌英發或數日不出案牘填委一出堂皇片時盡了邑人避役者或請託上官檄免卒不可得幾得罪不悔後擢給事中

李復陽字宗城豐城人進士萬曆十一年任編役平允值

歲饑捐俸金出贖鍰以賑循行阡陌勸課農桑嘗延顧

憲成講學擢禮部主事歷官通政參議

趙應元字肖鶴新會人進士萬曆二十四年任歲己亥朝

廷遣中使權吳中商稅其屬奉檄至需索百端應元嚴馭之條上便宜竟罷其屬邑以無擾明年江北監稅者以錫當孔道遣使設關北郭勢益張應元復力請當事得奏於朝不報而稅亦尋罷能聲振一時擢工部郎卒

林宰字德衡漳浦人進士萬曆三十年任理紛解錯恩勤盡瘁在任七年幾至刑措宰善飲每宴輒辭不任杯酌

無錫金匱縣志 卷十八  
及擢禮部主事搢紳出祖於郊意浹連飲百觴眾皆驚  
異因曰酒狂藥也恐誤民事且有家君之命故不飲耳  
今且別爲諸先生盡歡舉座歎息後謝兵部侍郎歸道  
經無錫環城皆焚香以迎祀名

許令典字維則海甯人進士萬曆三十六年由上饒縣調  
任吳俗好以人命誣訐每一狀行自拘提相視委佐貳  
下忤作對簿具爰書一切上下請託直視其家之貧富  
以爲多寡令典至初不行牌躬挾告者至尸所驗視面  
質不實多辭窮而退有他故則諭之使別具辭命役監  
葬而後聽理往往被訐者驚走縣門刺探虛實而事已  
竟矣令典又窮治淫巫四境掃跡自城隍廟以下皆封

禁終其任無敢窺者歷淮安知府

姜習孔字四可遂安人進士萬曆四十一年任束身勤職  
不博官聲不邀士譽而邑無冤獄擢南京戶科給事中  
劉五緯字夢鳳萬縣人進士天啟元年任精敏廉介具文  
武才案無畱牘摘發若神邑天授青城萬安三鄉圩田  
千頃遇澇皆成巨浸五緯躬率圩民併工挑築工成仍  
爲沃壤置設木櫃以收門稅令編戶自投晚則寄之質  
庫有夫役公費則發之增樓櫓嚴保甲整官塘五十里  
民立碑其上曰劉公塘祀名

郭佳允字夔一甯陵人進士由深州知州謫鎮江府知事攝無錫縣事時兵事方殷民知佳允有武略倚爲長城適有無爲州之遷迺相率號泣請於撫按疏留之有旨以奉直大夫除無錫縣知縣佳允益厲精釐弊警報狎至則飭諸胥役戎服佩刀親列行伍周巡坊市民以甯戢擢兵部職方主事歷員外郎尋爲常州知府

國朝

郭如儼涇陽人進士順治八年任政無赫赫名而撫民以慈待士以禮邑人愛之

黃之蔚字郁巖鄆城人順治十五年以貢生知縣事當海上用兵京口報陷邑人聞警思鳥獸散姦民將藉以鼓亂之蔚佩弓矢集吏民之魁岸者皆騎巡行城堡並召士民而訓諭之曰寇來有令在毋爲訛言煽惑境內以安在事三年以錢糧考成罷去

吳興祚字伯成原籍山陰人父執忠從入關隸正紅旗興祚以貢生知無錫縣時縣田久不清丈糧多飛詭隱匿興祚立清田由票就號丈田因田繪圖給田主爲永業民至今用之縣四百十四畝中六畝最稱煩苦輪役者或破家舊有入官田千餘畝興祚令糧長公買爲役費官爲僱募充役害遂息康熙八九年間累遭水旱民大

饑興祚設法賑濟全活者數千人蘇州駐防兵回旗民  
 洶洶興祚請都統令箭單騎往來彈壓民間市不易肆  
 迨耿逆告變師徒南下興祚先期儲備纖毫不以累民  
 一日大水溢塘岸兵適過境不得行興祚於塘之兩旁  
 樹竹為標馬行標中若坦途又標懸一燈以備宵濟其  
 倉卒應變多類此超擢福建按察使尋授巡撫遷兩廣  
 總督興祚莅無錫十有三年興廢舉墜禮賢愛士揮斥  
 金錢不少吝而囊無一錢之蓄云祀名宦

張琛字豈石湘潭人舉人康熙五十九年任俗故善訟琛  
 剽決如流頰面赤髭坐堂皇上貌若神老吏猾胥率斂

手畏避而憐才下士於邑中之有文行者輒先往過訪  
 旋丁內艱去士民奔走呼籲如失父母

武承謨字劭孟孟縣人進士雍正元年任清剛明敏豪猾  
 悚息禁賭博及婦女入寺燒香姦民移屍炙詐人財承  
 謨捕置之獄舊時縣官相驗人命自廉從胥吏作下  
 逮甲總恒集百餘人設案藝香爐以待費輒數十金承  
 謨一切屏省距城遠者操扁舟挾二吏徑至屍所立決  
 之事主不耗一錢鄉有以獲盜報者盜中道死報者惶  
 懼承謨訊實是盜釋不問莅事不三月乾隆志作四十四日嘉慶志作四  
月茲從以勞瘁得疾猶惓惓於民作論文以示未竟之  
識小錄

志讀者爲之淚下既歿邑人祀之惠山祀名

案嘉慶志傳載承謨一聯日照月臨天有難逃之眼民窮財盡地無可剝之皮又識小錄稱承謨到官一夕懸聯四而不及此聯茲并錄備考照壁聯罔違道罔拂民正直公平心斯無忤不容情不愛賄招搖撞騙法所必嚴頭門聯視民如傷錫邑蒼生皆我子修己以敬東林前輩是吾師儀門聯工可比官斧斤利刃隨手攜來因材而用醫堪喻政硝黃猛劑有時投下看病如何堂聯人人論功名豈即功名有實功名有實名存一點掩耳盜鈴之私心終爲無益官官稱父母何謂父母父必眞父母必眞母做幾件懸羊賣狗的假事總不相干

王喬林字文河錢塘人雍正四年以庶吉士出知金匱縣時金匱初設喬林操嚴而政平燭偽杜姦不尙束溼嘗攝無錫故令某以常平倉米藉典戶推換新陳有既輸如數而遺索印領者三年矣獨胥以報立銷而遣之諸戶並懷金謝卒不得間嘗仿浙西栽桑養蠶法俾民行之未成遽去在任日作興人文尤親禮樸學吳之枚有人詠之云不登言偃室常式段干廬官止知府

吳鉞字愛棠全椒人由貢生入貲爲知州乾隆二十四年借補無錫縣愛民如子煦煦嫗嫗人皆忘其爲令也邑之龍塘岸向有神軸懸村民家奔走男女如市賽會極盛時適患盜鉞至其處與神約期以二十日得盜首則許供奉如故如不得則當撤屆期不得竟撤之越數日盜亦得擢奉天治中同時知金匱者爲韓錫祚有才智工詩古文及書而清操雅望則不屬焉

無錫金田縣志 卷十八  
三  
俞鎬新昌人貢生乾隆四十五年任無錫有武弁擅民事  
拘四人送縣庭鎬詰之則已逸其二笑曰彼縱其二我  
亦縱其二盡釋之鎬斷事如神觀者訟庭恒滿調丹陽  
郭占選莆田人舉人乾隆五十二年任無錫潔已愛民不  
事敲朴民不能欺與諸生講文藝親於師弟

楊潤字雨窗絳州人貢生嘉慶七年任無錫誠懇慈愛能  
通下情與民語諄諄如家人民亦忘其爲官纖悉必告  
潤曲爲勸諭愛才尤至去官攜書數篋而已

葉申藹字次幔聞縣人舉人道光七年任無錫勤敏多善  
政尊賢禮士繕城垣重築西北隅數十丈修復二泉亭  
若冰洞龍光塔捐廉修廨署來悅樓牧愛坊並加葺焉  
閻廷桂平遙人以父泰和蔭得通判道光六年署無錫時  
銀驟貴小民輸銀恒折錢金令議每兩加百錢以敷官  
用廷桂不可曰金自不足錫自有餘毋相強也且銀貴  
則加銀平誰減吾終不受加賦名議遂寢

右牧令

宋

劉平字士衡祥符人性剛直善弓馬讀書強記舉進士爲  
無錫尉時有浙西賊劉鐵鎗犯邑平出擊之手殺鐵鎗  
及其徒五人餘散去歷官邕州觀察使爲鄜延路副總

管元昊寇保安軍平趨救之累戰被執不屈死贈朔方

節度使諡壯武

宋史有傳嘉慶志云平諡東都事略作壯勇秦觀集作壯愍

元

杜昶大德中為無錫州判重建州門譙樓昶董其役與吏

約捐官吏半期之俸不給則輟公田以繼之毋擾民既

成眾喜爭負鏹至昶止之不可悉委之吏舍而去官用

大足虞薦發記其事

明

王本字源清甯遠人宣德中舉人材督賦十年稱平允邑

有治農丞自本始擢知侯官縣

黃敬字克恭新城人由工部主事左遷無錫丞為政明敏

擢歸州知州

劉堅字廷實鄱陽人景泰初任無錫丞以清謹名

魏時敏莆田人少遊鄉校以才辟為邑從事成化間謁選

除無錫丞時敏工詩日與名流酬唱有竹溪詩稿事亦

無廢

周義三河人于資萊陽人並國子生正德中同為無錫丞

韓天賦光化人歲貢生嘉靖中為無錫丞三人皆以幹

才著

劉繼仁涿州人正德中以舉人知蒲臺縣抗疏論鎮守宦



官事逮下獄久之得直降無錫丞與知縣侯位同時以方嚴爲政

張時慶伊陽人貢生嘉靖中爲無錫丞有惠政及民耐祀

鄧繼曾萬虞愷祠

楊守直良鄉人國子生爲無錫丞屢攝縣事稱廉吏

楊春光安居人歲貢生萬厯中任無錫丞築圩岸不以顯貴撓法纖悉必謹遷本府經歷

王好義扶溝人貢生萬厯中任無錫丞倜儻負氣籍邑中惡少年痛懲之發大盜而斃之獄漕運官軍橫索耗米而譁飛石畿中縣官好義從容入厯階上手掣兩衛弁擲堂下數之眾辟易不敢動上官聞其能檄使監兌江陰松江所至懾服擢隴西知縣

鮮廷相枝江人國子生萬厯十七年任無錫丞能治冤獄居身以廉優免權賦爲民德

郭命賢字漢虹萬厯三十三年爲無錫丞侍郎孫繼皋送其歸益陽詩云上書不達賦歸來空橐何妨載石回臣自當誅曾出位眾皆欲殺可憐才三年水國將漕苦十日風江拍浪哀但不負丞休亦得幾枝殘菊媚寒杯似其人曾以建言譴謫者惜乎不傳

嘉慶志云益陽有郭都賢崇禎時江西巡撫秦瀛嘗按察湖南檢閱益陽縣志及郭氏宗譜並無郭命賢何邪

陳繼洲萬厯中官水利丞督邑中陂塘塘長釀錢為壽悉謝去以解吳帛入都中官索賄不應當事以此罪之竟罷去高攀龍為文送之謂繼洲有志自立異於忘恥冒利而深以其去為榮云

嘉慶志云繼洲應是字號舊志令佐表缺載僅見之高子遺書亦未詳何處人

蘇澤項城人舉人為縣典史永樂元年以平盜功進主簿事在知縣韓約傳澤在任嚴治博徒跡他方盜賊聞風屏息繼澤者謝勉以北平僉事左遷亦尚嚴厲豪民不得逞召為大理丞

莫諒四會人為縣典史乞終養歸尚書邵寶送之詩云堂上親雙老天涯客早歸他年毛義檄此日老萊衣晴嶺穿雲易風灘上水稀曾聞巡按語未艾獨知幾事蹟不傳殆亦簿尉中錚錚者

右丞倅簿尉

元

李棠卿樂平人任億豐倉大使張士誠入無錫棠卿抱印匿草間士誠購之急乃遣人懷印問道納之行省尋被執誘以祿仕不屈繫之倉所發憤卒贈樂平州判祀名宦案舊志遺棠卿事道光二十八年華湛恩據隆平紀事及樂平縣志所載補祀名宦湛恩為之記

右倉使

元

朱魯卿崇德人至正四年任無錫州教授清學田所入以修學宮老病貧士皆有給諸生立碑記其事尤良撰文

明

孟世威靈寶人嘉靖間訓導衛銳仁和人隆慶間教諭並著教澤士子祀之學宮儀門之左

譚魯始興人萬曆中教諭居常危坐莊語造次無狎容或勸通問長安可優擢魯謝之卒遷王府

呂鳴陽襄陽人舉人萬曆中任教諭與知縣柴恪同鄉薦未嘗以私有所關白將赴會試諸生中有德之者屬市人進米二十斛不取值鳴陽立還之擢敘州推官

國朝

錢壘字夏尊太倉人舉人康熙三十五年任教諭敦樸有古風所屬一窶生逋官課見辱縣吏爲質子錢償之嘗聘校浙闈稱得士再轉安慶教授未赴卒其後任李曙松江人亦稱廉明

郭一臨字晴川吳縣舉人無錫教諭趙基字葯亭吳江歲貢生金匱訓導同時在任最久並喜引掖寒畯招至學舍與子弟切劘文章成就甚眾一臨於嘉慶中兩修文廟勸助尤多

張立本望江人貢生嘉慶十四年任金匱訓導廉介有守  
教士多方著有培庵漫錄等書

朱杰婁縣人舉人嘉慶二十五年任無錫教諭勸修學宮  
集資存貯生息以為歲修費又增置禮樂器倡諸生肄  
習樂舞卒於官

右教職

無錫金匱縣志卷十八終

無錫金匱縣志卷十九

宦望

史載人物凡以功名見於世者大都人自為傳不以類  
從而方志恒特標其目此宦望所由名也邑之人才莫  
先乎季札然以諸公子而封延陵非仕宦比又其事已  
具於世家故舊志既錄而後志去之允矣茲用故例拾  
遺哀輯蓋不敢意為去取焉志宦望第二十二

漢

王關字選公明易及天文郡舉為主簿更始中守山陰令  
補侍御史遷冀州後拜謁者僕射終陳留太守不交豪

強人號為王獨坐

三國

顏連仕吳為居巢長奮威將軍領丹陽太守孫瑜使與襄安長饒助招納廬江二郡多所降附事見吳志

晉

顧悅之字君叔少有義行與簡文同年而髮早白帝問其故對曰松柏之姿經霜猶茂蒲柳常質望秋先零嘗為殷浩吏浩既廢卒將改葬悅之抗表訟之言浩出鎮壽陽羣醜革面進軍河洛修復園陵不虞之變功崩垂成忠款之志於是而廢既受削黜自擯山海杜門終身可

謂克己復禮窮而無怨者也方今懸棺而窆禮同庶人

仰感三良昊天罔極若發明詔崇復本官死而可作無

負心之恨疏奏追復浩官始悅之將訟浩浩親故多止

之悅之決意以聞既又爭於朝乃得請時人稱之為州

別駕歷尚書右丞卒子愷之見文苑傳

晉書附殷浩傳

案萬歷志及康熙乾隆庚午志皆以顧悅之為無錫令列於職官表及遺愛傳識小錄始疑之謂晉書既不言為無錫令而毘陵人品記以悅之為無錫人王仁輔志言悅之為州別駕子愷之遂為無錫人亦未列於令佐今志以為邑令未知何據云云嘉慶志謂明顧起綸建悅之祠始稱無錫令前志誤因之既列於令又祀鄉賢尤為矛盾於是去遺愛傳而仍存其表考乘亦定其為邑賢以為遺愛既刪宦望補今考晉書本傳不載里籍蓋以附殷浩傳下故其文不具耳而愷之傳稱晉陵無錫人此即足以互見悅之為無錫人殆無可疑王仁

輔志雖未列於令佐然於悅之為州別駕下接云子愷之遂為無錫人是其誤實已始此本傳祇言州別駕未嘗明指其地江南通志云悅之晉陵人為殷浩揚州別駕似亦臆度而考乘謂晉書載悅之晉陵人者亦誤彼所見蓋通志之傳而於晉書實未寓目也茲補傳宦望而職官表悅之名亦并去之

唐

李紳字公垂其先趙郡人父悟任晉陵令因家邑之梅里紳為人短小精悍於詩最有名時號短李蘇州刺史韋夏卿數稱之初擢進士客金陵李錡辟掌書記錡寢不法紳數諫不入欲去不許會使者召錡稱疾不行脅使者為眾奏天子幸得留錡召紳作疏坐錡前紳陽怖栗至不能為字下筆輒塗去盡數紙錡罵曰何敢爾不憚

死即對曰得死為幸即注以及令易紙復然或言紳不足用即囚紳錡誅乃免或欲以聞謝曰本激於義非市名也久之從辟山南觀察府穆宗召為右拾遺翰林學士與李德裕元稹同時號三俊累擢中書舍人敬宗立李逢吉積怨紳結中人王守澄奏言先帝始議立太子杜元穎李紳勸立深王由是貶紳瑞州司馬後敬宗得先帝手緘書笥見裴度元穎紳三疏請立帝為嗣始感悟悉焚逢吉黨所上謗書徙滁壽二州刺史霍山多虎擷茶者病之紳至虎不為暴以太子賓客分司東都遷河南尹河南多惡少或危帽散衣擊大毬尸官道車馬

不敢前紳治剛嚴皆望風遁去遷宣武節度使大旱蝗  
 不入境武宗卽位召拜中書侍郎同中書門下平章事  
 進尚書右僕射門下侍郎封趙郡公居位四年以足緩  
 不任朝謁辭位以檢校右僕射平章事復節度淮南卒  
 贈太尉諡文肅

新舊唐書有傳

**宋**

杜杞字偉長祖鎬見文苑傳杞以蔭補將作監主簿知建  
 陽縣強敏有才累遷尚書虞部員外郎知橫州安化蠻  
 寇邊杞言嶺南諸郡無城郭甲兵之備橫爲邕欽廉三  
 郡咽喉地險阻可屯兵爲援邕管內制廣源外控交阯  
 願擇文臣識權變習嶺外事者以爲牧守改通判眞州  
 徙知解州權發遣度支判官盜起京西拜京西轉運按  
 察使居數月賊平會廣西區希範誘白崖山蠻蒙趕反  
 襲破環州嶺外騷然擢刑部員外郎直集賢院廣南西  
 路轉運按察安撫使行次眞州以書諭蠻聽其自新次  
 宜州蠻無至者杞乃勒兵攻破白崖黃泥九居山砦及  
 五峒焚毀積聚斬首百餘級復環州賊散走杞遣使誘  
 之趕來降謂將佐曰賊以窮蹙降我威不足制則恩不  
 能懷不如盡殺之乃擊牛馬爲曼陀羅酒大會環州伏  
 兵發誅七千餘人後三日得希範醢之以遺諸蠻御史

梅摯劾杞殺降失信詔誠諭之爲兩浙鹽運使徙河北拜天章閣待制環慶路經略安撫使知慶州杞上言殺降者臣也得罪不敢辭將吏勞未錄臣不敢受命因爲行賞未幾卒杞性彊記博覽書傳通陰陽術數之學兄植以文雅知名累任監司終少府弟樞亦強敏爲比部

員外郎

宋史有傳

強翊字君翔元豐中仕至郡牧與章惇素相善惇旣相翊惡其所爲致仕歸強氏任郡牧者五人故號五牧強氏許德之字振叔紹聖元年進士爲揚州法曹與晁詠之韓韶蘇象先同爲掾號維揚四俊徽宗嘗召見便殿德之

對治無多術惟進賢退不肖有賢不能用與非賢而遽信雖勤不治擢司封郎中遷太常少卿以顯謨閣學士知婺州坐方臘寇起貶賓州高宗卽位復官奉祠

王岡字壽祺元符三年進士除國子司業通判揚州丞相呂頤浩統戎任辟置幕下高宗南渡頤浩爲御營使以岡充參議官多計畫後丐祠歸紹興初召爲比部郎中以朝散大夫直祕閣致仕

李謨字茂嘉幼孤事母孝家貧感憤向學登崇甯五年進士徽宗聞其才擢廣東運判入對留爲太常丞遷監司遍歷河北高宗卽位直徽猷閣歷知鎮江臨安兩府遷



寶文閣移鎮京口卒謨厯事三朝並蒙知眷屬當時艱  
閱兵走馬於燕趙間隨事制變皆得其當世以爲奇才  
施垌字林宗崇甯五年進士除太學博士宣和末提刑江  
東朝命鑿銀林河通大江調役繁興垌以導江入浙蘇  
秀必受其害抗疏極言不便役遂寢徽宗下詔獎諭進  
秩一等累遷禮部侍郎顯仁太后回鑾垌考定儀注終  
敷文閣待制垌素孝友在官得親書必冠帶跪讀遇恩  
奏補官必推及弟姪弟垓有吏績紹興末累持節終朝  
議大夫湖北轉運使

費肅字懿恭少好學大觀三年進士以薦除祕書正字靖

康末高宗開府於鄆肅主饋運及駐蹕廣陵首召入館

既遂歸隱錫山建炎末御史中丞富直柔薦肅與陳與

義張闕三人乞召用陳張赴闕肅獨辭參政張守累寓

書勸駕卒不起孫衮見文苑傳

陳之茂字卓卿紹興二年張九成榜進士廷對忤權臣黜  
之九成叩頭殿廷曰臣之學不及之茂臣不當得之茂  
能言人之所不敢言之茂宜獎不宜黜上覽對悚然曰  
忠言也賜之茂同進士出身除休甯尉遷祕書郎官至  
吏部侍郎兼中書舍人直學士院之茂剛果英特深識  
治體壽皇銳意恢復嘗默察強直可倚任之士期致事

功每深器待將大用而遽卒朝野惜之之茂能詩畫尤有法弟之淵字宗卿善左氏春秋與兄同入太學時號二陳復同舉進士終祕書閣修撰知宣州之淵識度冲曠温粹不矜人服其德

蔣芾字子禮宜與人自其祖璿始居無錫芾紹興二十一年進士第二人孝宗卽位累遷起居郎兼直學士院時宦者梁珂恃潛邸恩撓權尹檣論珂與祠芾繳奏罷之簽書樞密院事奏言加意邊防請拔將材於行伍除權參知政事同知國用事芾言今財莫費於養兵而招兵耗蠹愈甚請權停一年有半又采眾論參己見爲籌邊

志上之拜右僕射同中書門下平章事兼樞密使帝銳

意恢復廷臣議或主和詔芾決之芾奏天時人事未至

忤上意除觀文殿大學士知紹興府提舉洞霄宮尋落

職宋史有傳

尤焞字伯晦祖表見儒林傳焞嘉定元年進士嘗出帥淮

西威惠並著封毘陵郡侯仕至禮部尙書端明殿學士

與參政楊棟盧鉞俱負重望爲言者所中乞休時論惜

之卒諡莊定祀浙江名宦

元

徐憲字元度博學能詩延祐間由校官辟三公府掾時漕

運道梗擢大司農經歷奉詔度東薊州曠地爲田募江南民數千人耕之經畫樹藝有法拜內臺監察御史歷兵部侍郎卒於官

孟棡字叔敬長身玉立善篆書至正初以儒試吏司處州學校調温州方谷珍寇起御史大夫納麟署爲行軍鎮撫張士誠兵逼杭州棡以孤軍護平章答失退保北關官民多遁棡勸杭守立賞格士氣遂奮有獲台民管惟善指爲方寇壻棡白其誣并察所略平民悉縱之長鎗賊叛據蘭溪治書鐵木列思分臺於婺調棡總兵擊復之旣而寇復至棡嬰城固守力困糧盡城陷棡出走御史長壽等交薦歷溧水同知福州路判官以浙東宣慰副使僉元帥府事致仕屏居惠山以終

朱堂字子升祖君實慷慨有志行堂性凝恪好讀書至正間薦授紹興路知事以廉正稱未幾引疾歸旣歸而有方谷珍之亂人服其知幾云

**明**

俞溥字彥淵洪武四年舉閑良官授都督府經歷降敕褒其才智練達夙夜勤慎拜戶部尙書歷江西行中書省參知政事與張籌同致仕歸兩人時布衣至惠山與僧普真游人不知爲兩尙書也

宣仲庸字顯甫洪武二十三年以人才舉知息縣莅治勤敏凡有徵辦必盟於神而後行民無怨讟官亦無墮事同時有楊宥者由上舍生官濟甯州佐愛民如子民爲之作青天謠

陳禮字允修建文二年歲貢歷官戶部郎中至湖廣左布政使敷歷內外有經世才繼母瞽事之曲盡誠孝中年妻亦瞽愛敬不衰旁無妾媵其庶妹生而瞽撫之如女殷序字序賓永樂二年進士授黃巖知縣遷高唐知州成祖北征序處置迎輿事稱旨擢江西右布政使調四川北京初建序職采大木役不病民蜀人德之宣德二年

西戎寇茂州城中老弱不及二千人序馳往設守隨方拒敵募善泅水者齎蠟書趣援援至賊退保山巔累石爲峒房兵器不能攻序命積薪縱火焚之賊困皆投下生禽二千人賊首乃悉眾詣軍門降計七萬八千餘人嚴諭而遣之事聞賜金幣羊酒遷雲南左布政使謝事歸

蔡弼字慎軒永樂初由歲貢除刑部郎慮囚多平反擢瓊州知府屢平海寇興文學凡六年歸主僕更負行囊旣踰嶺貿衣以食有故人留訓其子獲脯資始得歸

尤實字實達永樂四年進士以主試王達妻黨黜尋薦授

南昌府同知閑名法善折獄權知府事銅羅障賊起檄實司餉以勞卒南昌人建祠祀之

呂銘字允銘永樂中舉求賢科擢刑部主事獄訟立決吉水周忱時爲同官甚見推服終西安知府始治以猛後濟以寬遠近稱之同時有蔣觀字伯庸以人材厯官登州知府與銘皆有聲

吳禮字幼文由諸生爲功曹永樂中薦授刑部主事厯禮部員外郎會大祀上出稍遲疏諫黜爲均州守督太和諸宮事以嚴明爲政家貧至不能具餐飯日啜粥糜而已

曹恕字以忠博學工文章薦爲漳州訓導以祖母老乞休忤旨戍山東永樂初以僉事王亨薦起上言四事皆切時政詔復職教習駙馬卒所著植梧集多記無錫宋元間事

嚴獻字廷助永樂九年舉人厯高安玉山岷縣知縣以清惠見稱每去官橐裝惟大明律一部古琴一張最後去岷見役夫攜琴度嶺慨然曰此琴相隨久勞民多矣并棄之

張思安字克讓永樂十年進士年二十六擢陝西按察使僉事調山西再補湖廣屬荆南多虎思安移文黃陵廟

患遂息以誑誤得罪赴京師當僦工運輒以贖貧不能  
辦躬執役期滿歸正統初起復官楚臬進陝西副使

俞雍字文熙永樂十八年舉人授公安知縣修庶務勸耕  
桑大學士楊溥每稱於朝以爲古之循吏

陳士名字孟聲由國子生授貴州新添衛知事正統末苗  
賊攻城士名率眾死守得全擢南靖知縣爲治以寬簡  
稱初士名同門友陳昱歲當充貢以士名年長讓之昱  
繼入胄監授同安知縣與南靖鄰聲相埒

薛恒字履常宣德中舉儒士歷蘭溪知縣吏民畏服之  
吳益字永貞由國子生除懷安知縣有豈弟之政考最擢

太僕丞

談泰字履亨宣德七年舉人授宜君訓導以尙書胡濙蔣  
守約薦擢南京監察御史出爲四川僉事益勵清操綱  
紀振肅旣卒官橐無餘資

馮諱字孟敬正統三年舉人官戶部員外郎擢四川參議  
督七郡糧儲會計有方賦用以足

楊璿字叔璣正統四年進士除戶部主事累遷山西右參  
政覈戶均役民稱便利督輓軍儲實邊事集而人不知  
勞進陝西右布政使拜戶部侍郎改右副都御史撫治  
荆襄流民巡視東北諸邊鎮單騎赴官宣命拊循旣而

盜起房竹殲其魁而散遣其餘移撫河南禁游末抑豪右以勞卒官予祭葬

王訥字敏行正統四年進士授建安知縣遷威遠陞沂州同知以勤敏聞

吳清字景夷由歲貢授萬安知縣有介節罷官歸囊無餘貲病亟謂其子曰古人親澣濯父中裙汝盍視我裏衣乎子視之補綴如懸鶉敝袴至不可紉

周清字本澄景泰二年進士選庶吉士改南京監察御史清軍四川布袍羸馬至則盡黜冒濫尺籍畫然卒於叙州

盛顛字時望景泰二年進士授監察御史時石亨以冒功啟邊釁顛及同官張鵬周斌等疏劾之帝先受亨愬怒逐諸言者顛出知束鹿縣豪右聞顛至相誠曰是劾石總兵者束鹿徭役苦不均顛爲立九則法繼者莫能易母憂去服除民相率詣闕乞還顛既再任不用鞭朴有爭訟者好諭之輒叩頭服鄰邑訟不決亦皆赴愬郊外隙地爭來築室居之遂成市號爲清官店擢知邵武府移延平巡按御史上其績進一階歷廣西雲南陝西布政使拜刑部右侍郎山東饑盜起改顛副都御史往撫之設施有法賑恤餘粟尙百餘萬石又推行九則法

於諸府黜暴除苛民甚德之年近七十致仕歸卒明史附楊

瑄傳

陸志字仲熙以歲貢授成都知縣土闢民歸邑大治日食脫粟野菜常祿悉以助城工所攜二僮不勝苦逃去罷官徒步歸

尤諤字正言景泰元年舉人除遂安知縣遂安俗少育女者諤力加禁斷民大疫為迎醫於常山以療巡道李部卒假捕盜名剽劫民間諤禽六十餘人寘之法李愧憤中以他事繫獄事竟歸

周冕景泰元年舉人授林縣知縣慈祥端謹民吏懷畏秩

滿陞甯波府通判見林縣志

張遜字時敏景泰七年舉人授同安知縣府志作東安內豎侵

民田遜復之建倉儲粟為備荒策遷福甯州戢濱海盜均徭役改涿州涿多奄豎家遜不阿不激處之帖然有安州監生張錦以人命誣其守逮者三百人數年不決又任邱令謝某執指揮張某下之獄張訟之並檄遜就勘皆片言折服擢守福州振舉廢墜治稱最

秦夔字廷韶天順四年進士授南京兵部主事歷郎中出知武昌府立均徭法監司下其規約於諸郡嘗行江干見一婦人縛而委之沙中救而問之則遇盜不從故至



此夔卽日踪跡得盜寘之法而歸婦人於其家調建昌民有將訟其令於上者令疑所讐何某者爲之陰令人首何他事遂文致其罪置極典夔疑焉密鞫首者得其情而釋之他郡有疑獄待決於夔累遷江西右布政使夔歷官四十年家僅有田三頃

陳賓字朝用士名子天順八年進士由吏部考功司主事歷郎中不徇私請終賓任無戚里陟要津者出參閩藩遷布政使所至有政聲累平反疑獄擒大盜王槐等伏法大學士李東陽以開府薦五上書致仕

厲昇字文振性褊介不苟合由歲貢授青田知縣縣居萬

山中民貧以猾時有報銀礦者力爭之得寢致仕歸民立祠祀之同時錢綱字孝常以國子生除偃師知縣大著威惠至今稱邑中名吏必曰厲青田錢偃師

談綱字憲章成化五年進士授南京刑部主事善折獄出守廣信屬邑永豐有警綱籌其久遠利害條上十事巡撫用之大爲民便移萊州引疾歸

陸清字源潔成化元年舉人任夔州同知攜二蒼頭往務鋤暴安良一郡奸民幾空二年歿無分毫積俸僚友歸其喪民立碑市中曰慈惠義勇清廉貞直無錫陸公

苗澗字時雨成化四年選舉表貢生知合江縣有政聲卒

祀名宦

見合江縣志

華山字仁甫成化十一年進士授許州知州有王僉事之子某其婦翁又司馬也怙勢殺人監司庇焉山力持之卒抵法臨穎令入黠者言抵平人盜令執政舊交也事發而法吏減其罪山爭之卒如律歷兵部郎中湖廣參議鄖陽饑山不待報發襄陽粟賑之致仕歸

繆昌字廷謨成化十四年進士授工部主事奉敕勘武清勢家地還民民立生祠祀之出爲山西參議遷守遼海歲饑撫臣欲散粟貸民昌慮官吏或乘此爲姦議以平價糶之秋收糶粟補官萬口稱便擢四川布政使尋卒

陳周字文美成化十七年進士授戶部主事督漕奏蠲浙閩逋稅出爲河南參政行部得穴金悉以償汝南之民貧不能輸官租者周王侵民田周悉理還之

呂尙字宜中少孤力學成化十七年進士授大名推官歷衢州永平以至誠決獄躬詣囹圄視囚藥食囚多畫像祀之擢監察御史尙簡易端確不事作業妻子恒饑浩然自得巡按雲南舉劾清嚴民以無枉未幾乞歸

張愷字元之成化二十年進士官兵部主事守山海關故事籍錢於旅人以給官用愷至立除之改刑部左遷東平知州宦官李興治河張秋笞辱長吏奔走餽遺愷不

爲動擢知黎平府黎平轄苗疆治寓湖廣之五開衛苗  
旣懸遠難縻而來入稅錢輒爲官軍攫奪以是積有逋  
課又舊設撫苗指揮反以朘削爲苗害愷亟請罷遣而  
檄湖廣諸司嚴戢官軍於是苗患悉除而稅錢得完尋  
忤劉瑾落職再起太原遷福建運使

莫驄字曰良成化二十年進士授工部主事管濟甯閭閻  
旁月河洩水歲爲築堰而水至輒決驄易以石費省而  
民賴之有閹筆殺委官驄聞立寘之法遷兵部郎中興  
藩之國索車千兩驄損其半爲內侍所訴有旨械繫旣  
而釋歸

吳學字遜之成化二十年進士授行人擢御史條上十事  
皆切時要武宗甚重之呼爲長面御史巡按河南勦流  
賊有功歷山東按察使劉瑾惡之請老歸學博洽能詩  
工書法

華津字濟之成化二十三年進士授松滋知縣姦人挾藩  
府以權民財津寘之法遷刑部主事改戶部監通州倉  
中監私人請事不應出守廣平請蠲常賦外民不能供  
者數事太僕丞議收養馬民所免地稅錢十之五津白  
巡撫寢之邯鄲縣每秋水至輒壞城郭津曰山水本挾  
西河橫流舍河而事修築雖勞無益乃改河上流北注

之漳其害遂息仕終山西參政

楊文字宗周少嗜學家貧躬耕自給舉宏治三年進士授金華上治道八事入爲國子監丞應詔陳言多切時弊監有羨金分致於文不納遷壽府長史引疾歸性寡合惟與尤弼善弼由成化十九年舉人授蒼梧知縣果介自信嘗七疏西南邊務多見施行歷宰荒徼並著聲績以忤權貴罷職

羅柔字文徽宏治三年進士歷官戶部郎中出知建甯府時流賊剽略人情洶洶柔挺身捍之賊從他道去爲吏強項失當事意遽拂衣歸

陸廣字士宏宏治三年進士授戶部主事監太倉出納雖竹木葦秸無敢奸者藩邸賜田侵民地無敢往覈者廣請行立正其界出知南康府致仕

殷貴字南金宏治三年貢生任陽山知縣有兄弟爭田貴仿蘇清河故事理論遂息決死囚焚香告天而後定讞署置響板以達寃者貴疾民爲百里求醫及歿民皆巷哭邵文莊稱其論政似崔實憂時似賈誼云

秦鎰字國重宏治五年舉人授涿州學正陞瑞安知縣瑞安濱大海山島錯雜鎰嚴設戒備盜不敢犯潔已愛民頗著惠政歷官南京刑部員外郎周府左長史祀瑞安

名宦

錢榮字世恩宏治六年進士歷官戶部郎中奉命巡河濬川築堤民不苦役而權豪多惡之武宗駕自南郊還百官迎道左邏者忽執榮去訊無所得乃釋時劉瑾亂政榮三疏得歸養

秦金字國聲宏治六年進士授戶部主事歷郎中正德初遷河南參政破流賊趙鏐於陳橋遷山東布政使擢副都御史巡撫湖廣討叛苗平榔桂猺入爲戶部侍郎世宗卽位中旨各宮仍置皇莊金言西漢盛時以苑囿賦貧民今奈何剝民以益上乞勘正德間額外侵占者悉

歸其主而盡撤管莊之人帝稱善從之嘉靖二年擢南京兵部尙書上疏曰陛下臨御未幾政漸不能如初初政所以清明者政出公朝也今政所以淆溷者政在左右也宮府之地隔而信任有所偏婦寺之情親而聽受有所蔽名曰總擘而太阿之鑄實移於下矣尋改兵部召爲戶部尙書帝欲考興獻帝金偕廷臣伏闕爭又與何孟春等條張璫建議之非及上聖母冊復不至帝切責之金爲人樂易及居官一以廉正自持在戶部尤孜孜爲國內府諸監局軍匠至數千人中官梁諫請下部采金玉珠石奸人遂俊等乞兩淮鹽引三十萬金皆力

爭積失帝旨六年春以考察自陳乞休歸閔四年起南  
京戶部陳利民六事召為工部尚書加太子太保再改  
南京兵部致仕卒年七十八贈少保諡端敏

明史有傳孫柱

字汝立以諸生授中書舍人大學士高拱得辜倉皇去  
京師官校方四出偵視諸門下皆走匿柱追送百里外

吳中行疏諫張居正奪情被杖下詔獄柱挾醫往視湯  
藥居正積前嫌遷柱魯府審理尋以考察罷歸

明史附金傳

陳策字嘉言宏治六年進士歷戶部郎中出知饒州桃源  
峒寇與官軍相持五年不下策單騎入其巢諭降之會

朝正去郡寇復叛策至因先驅入犁壁山營而居累戰  
皆捷以其地僻遠疏置萬年縣控之夷患乃息調守嚴

州擢福建左參政奉命征汀漳寇道出同安降其劇賊  
蘇世浩攜以行檄至而汀漳之寇爭附策撫而遣之遷

江西左布政使時宸濠初就禽武事未戢策至警城墉  
籍府庫賑其餘民經畫撫循動中機要未幾致仕

華景字文光宏治九年進士由庶吉士改戶科給事中嘗  
疏言天下之財聚於大臣大臣之財聚於內官一時爭

傳其語遷南太僕主簿至滁陽革輸馬踰期之罰出守  
饒州以耕種貿易之法諭徭民徭皆帖服擢四川左參

政鎮守內臣以重賂啖景求市茶西番景拒不許遷福

建右布政時閩軍變後猶洶洶以食缺相譁景謂亂由  
闕糧弊在折徵請於朝給之眾乃定江彬用事部校四  
出索貨獨憚景不敢肆終左布政使

呂元夫字仁仲卣子宏治九年進士授禮部主事改吏部  
文選司馭吏清嚴苞苴絕迹初選籍多蠅頭細書爲黠  
吏摹洗移甲乙元夫命更大書遂著爲令擢南通政司  
參議進太僕少卿致仕歸元夫敏而有識嘗預修孝宗  
實錄獨成四十卷乙丑分考會闈拔一卷識曰此必端  
士乃湛文莊若水也元夫善草隸亦能畫弟亨夫字思  
泉以歲貢授浙江政使都事工詩

葛嵩字鍾甫宏治十二年進士除行人擢禮科給事中再

疏請覈魏國莊田旋奉命閱薊州倉上四事曰謹收納

禁饋送抑權貴清屯糧尋遷工科正德改元南科道有

以言事被逮者嵩論救劾劉瑾乃勅致仕歸

明史附  
劉瑾傳

朱絃字廷和宏治十五年進士授臨海知縣擢御史出按

貴州貴州鄉試士子皆遠涉千里就試雲南絃疏請分

試詔從之以事謫判福甯遷雲南府同知終代府長史

辛銘字警之宏治五年舉人署平湖教官勵操勤訓品隴

人文高下百不爽一平湖人祀之學宮

盛夔以太學生授兵馬使正德初擢漢州知州廖賊入境

官兵防禦夔司餽餉供調發悉有條理民賴以安尋擢

叙州府同知夔長於吟詠郡中傳其詞賦甚多見四川通志

錢憲正德九年進士知常山縣年少才高遇事立辦時宦

官用事往來驛騷憲駕馭有方人不敢犯見常山縣志

喻義字宜之正德九年進士授南京戶部主事遷武昌知

府遭母喪歸服除補南甯率以禮教忠州二酉爭職構

亂義單車詣其壘反覆開譬辭旨慷慨酋感泣輸情在

南甯五年致仕

華金字子宣性嚴靜無妄言誠行正德十六年進士授戶

部主事累官天津副使遇上官不能屈節遂致仕先是

金同年張孚敬驟貴欲致金金陵卻之尙書陸完之妻

金姑也完盛時不一過其門及敗為卹其孤而收其母

之喪於獄

顧彥夫字承美正德五年舉人授太常寺典簿寺卿呂構

重之為忘分交累遷甯波府同知署慈溪縣民為築清

清堂

侯祖德字繩武由國子生除新昌丞攝會稽諸暨二縣以

清節著擢知江山政平訟理案無留牘陞太僕丞乞歸

養母遂不出

朱象賢正德十一年舉人任雷州通判祀廣東名宦



蔡亨字嘉會由國子生爲縣學博士歷興府教授事世宗於藩邸嘉靖初拜光祿少卿總裁獻皇實錄遷太常奉使諸藩陰察向背贈遺無所受人莫敢干以私及歿資產不直三百金

談愷字守教父一鳳字文瑞宏治五年舉人官應山知縣決疑獄平劇賊移官平江歸愷嘉靖五年進士歷官戶部員外郎出爲山東副使時開馬場湖值歲饑愷藉工寓賑旬餘而畢坐事謫信宜典史五遷而後爲四川副使蜀地多盜民被誣引輒竄伏愷盡釋之復其故業歷廣東布政擢副都御史巡撫南贛汀漳贛賊李文彪海寇徐碧溪各攻陷沿海城邑愷開誠布信降文彪平碧溪拜兵部右侍郎移鎮兩廣兩廣山箐險密蠻峒聯絡四出焚掠殺千戶黎元愷進討捕斬五千五百餘人平之尋勦大羅山賊將就俘乞骸歸後督臣追疏愷功加右都御史

丁謹字懋庸復姓俞氏嘉靖四年舉人時有建坊金謹以畀族黨之貧者徒步赴京師會試十年不第家益貧與一僕文壽者相倚自給知縣鄭普久知其名而未相識將去詣謹請見強而後可再拜歎息乃行舉三十三年進士除黃巖知縣治務簡靜至官八十日而卒

安如山字子靜嘉靖八年進士選庶吉士出爲裕州知州地險多盜民皆外徙如山至諮其疾苦而安集之會戶部括天下田因履畝丈量方始事而部輒更令如山卒竟其役民利之歷江西參政四川僉事歸

胡雲嘉靖七年舉人知松陽縣不畏強禦勤政勵行文士貧無力者助之娶時採冶務劇使輶旁午雲不爲屈民

賴以安

見松陽縣志

高材字充甫嘉靖十年舉人授黃巖知縣邑有黃尙書綰威重而倨有事常北面縣令而命之其舍人子多持吏短長材至一繩以法無少顧巖俗好訟材捕訟師令各署名楮尾曲者并罪之訟由是減御史清軍兩浙姦胥出入其籍官無由得其要領材忽至胥家得故籍破壁土中胥伏罪時御史以無名冊督里胥多死者材進曰台以方谷珍倡亂高皇帝怒而籍之大抵有虛籍而無實名卽胥有作姦者其人已死今所杖無乃枉乎御史怒拂衣起然事亦旋解有貴家以牟利啟釁島夷者一夕賊乘風突入邑無城請援不至材召眾誓殺賊斬獲甚多賊乃走而材竟以是得謗歸

浦應麒字道徵嘉靖十一年進士授館職以修孝宗實錄功擢經筵講官東朝建晉左贊善主癸卯北闈試患文

習膚蔓力還淳質甲辰預校殿試策不中枋臣指拂衣歸于大冶工詩文晚徙居常熟

尤魯字懋宗嘉靖十一年進士除行人奉使汴藩歸上封事陳藩臣虐民之害累官工科都給事中首劾罷勳臣倖宦鬻放軍伍者五人既又疏請節幸御保聖躬蕃皇嗣辨異端擢順天府丞攝尹事奏革占役借馬出巨璫故人死罪十人禽大猾於戚畹宦寺之門甚著風烈

王瑛字汝玉嘉靖十一年進士除太常博士時世宗方興禮樂崇郊社百神之祀瑛日贊秩宗斟酌舊典擢監察御史奉敕理冀北山東河南馬政出按福建舉措精允性簡亢負氣激昂致叢議謗因謝病歸

鄒子進字右湖嘉靖十三年舉人福建汀州府通判時洞瑤作亂方調重鎮彈壓瑤堅守乘閒殺掠督撫難之子進單騎入諭降其九洞獨放半坪瑤屢反側九洞請合官兵勦之以功升同知食四品俸汀人感其德祀名宦祠歸田後務農自給

陸子明字東卿嘉靖十四年進士官戶部郎督遼餉立接遞法監京儲立推陳法使輓者常暇而貯者常堅好出備兵廣東威信懾瑤砦殲其尤獷狡竄掠者浹歲徵治行還朝行及杭州卒其門下士爲錢塘令殯而歸其喪

行麓中惟貯硯材大小十六枚而已

秦坤字靜夫由例貢授紹興府經歷嘉靖十四年署常山知縣潔己恤民節使客供應被謗巡按御史張公敬廉其情任之時衢州興惠庫庫子暨廣盈倉斗級常民值役者俱破產坤請罷免士民德之勒碑白龍洞見常山縣志

按此傳據考乘補而秦氏譜載坤為太學生由蒙化衛經歷改紹興與此微不合

吳情字以中嘉靖二十三年進士第三人授編修歷侍讀右春坊右諭德典應天鄉試被劾左遷歸久之吏部奏白其寃以原職致仕居家省農桑教子弟竿牘之間不及長安割產置義田贍族晚自號靜端居士

尤瑛字汝白嘉靖二十三年進士授國子監丞歷禮部郎中擢廣東僉事時有賊殘閩之六縣而其有司妄指廣民移檄趣捕瑛不聽賊亦旋就撫瑛在粵四年治盜多有斬獲終江西參政

秦淮字伯川父鏗見孝友傳淮歲貢生嘉靖二十四年知辰谿縣勤恤民隱而帥之以正毀淫祠除奸弊招撫流移捐修學校以老致仕祀名宦湖廣通志有傳弟涵字問詹由舉人任温州推官甌人重其治行

秦梁字子成嘉靖二十六年進士授南昌府推官有盜平十二者負險時出剽劫梁察尉某陰與盜通以危言詰

之尉股栗搏頽請命乃曰爾能離其黨而以酋來爲貸爾命尉如言縛至磔於市拜吏科給事中京師築外城梁被命董其役劾罷宦官奸工事者進通政司參議南太僕少卿歷鴻臚卿右通政出爲浙江參議山東副使督學浙江所識拔多英俊雅負人望遷江西右布政使華文甫字西橋嘉靖二十五年舉人任昌化知縣諳治體悉民情請革會江驛役抵解銀兩及除本縣遞送夫馬政聲卓然

見浙江通志

馬濂字濬卿嘉靖二十九年進士除仙居知縣倭寇黃巖來犯濂擊走之爲治悉下情民依之若慈母歷官桂林

知府從討峒獠或以僞酋首級邀賞濂立辨其非越四日果獲眞者

鄒懋昭字汝德少從唐順之學講求經世之務嘉靖二十五年舉人除應城知縣值歲饑約己以爲民先景藩與楚藩爭封界懋昭購致諸詭籍折之乃阻巨璫橫責民租嚴制之不得逞未幾罷歸

秦禾字子實淮子嘉靖三十二年進士知武康縣會倭躡浙西被檄築城甚急禾曰築城民益驚擾是啟寇也持不可而募壯勇柵要害以守之諭曰寇來在令無恐及賊已逼有數妖僧突入市上禾勞以酒食陽約禦寇受

賞明日悉械送軍門賊聞遂不敢窺武康歷南京戶部郎中出知金華府調永昌祀永昌武康名宦

汪汝達字志行嘉靖三十二年進士知黃巖縣黃巖瀕海無城汝達至始倡築越三月城成寇再至得無患於是撫瘡痍集流亡理豪右所侵民田八頃給學宮以資養士擢戶部主事終廣西參議

祝舜齡字壽卿嘉靖三十二年進士知政和縣廉介絕人而吏事精敏擢南京戶部主事卒囊金不盈兩

何汝健字體乾原籍無錫以戎籍僉南京留守左衛其祖岳嘗得遺金於道候其人還之有侵其墓地以葬者不與校曰吾恐累及枯骨爾汝健登嘉靖三十二年進士授山東濮州以不畏權貴稱均田均役輿論頌之

楊成字汝大嘉靖三十五年進士除工部主事累擢至副都御史巡撫江西始至經理水旱檄各郡假工役以濟阻饑築圩岸濬陂塘民得養而所賴益遠甯州奉新諸處錯接楚壤逋寇衝突成疏移南昌巡道於甯州兼轄楚之興國等郡修城浚隍添營堡又相視贛江鄱陽諸藪澤要害每五十里設墩置遊巡使烽燧相望遂俘劇賊李大鸞盧尙巍等數十人誅其渠而散遣之又平安遠賊葉隆盛疏割安遠會昌地立縣於馬蹄岡盜賊以

息時山峒土姓大者陳兵自衛或以爭產相格殺贛撫  
臣名之爲賊請移師合擊成曰此一捕吏事耳不應旣  
而斬馘甚多會檄奏捷成謝卻之拜南京工部尙書乞  
歸復起歷南禮兵二部尙書子告加太子太保卒諡莊  
簡

嘉慶志云成宋儒楊時十六世孫時孫航倅常州因家  
無錫後徙長洲成謝八十存問疏猶自稱無錫人成孫  
廷樞崇禎三年鄉試第一名著  
復社順治四年以不雉髮死

華汝礪字用成嘉靖三十八年進士由刑部郎中出爲浙  
江按察副使備兵溫處會海水暴漲壞民田廬決城郭  
汝礪啟下流壩以殺水勢米價踴貴弛禁通商民免阻

饑更嚴斥墨吏忤臺使指論調雲南軍民愛戴如溫處

顧誦字東田嘉靖三十七年舉人任臨安教諭清敏負文

望訓迪不怠資給孤寒學宮圯捐資修築擢襄陽知縣

八閱月棄官歸遁迹湖山間爲雙清八老之會

浙江通志有傳

張子仁字安甫嘉靖三十八年進士除南京兵部主事歷

四川參議於是九絲之役御史疏舉有功不謝黜歸

再補遼陽終貴州參政

華啟直字禮成父舜欽瑞州知府有政績啟直嘉靖四十

一年進士知孝感縣改順天教授遷刑部主事時海瑞

以言事繫獄啟直左右之歷郎中出守永州擢貴州副

使苗結谿峒爲逆督府屬啟直往討啟直曰此首禍者一人耳他族虜掠可諭解也馳檄往酋皆受約束仕終四川參議

黃學海字宗于父正色見忠節傳學海嘉靖四十一年進士知內黃縣入爲戶部主事擢守贛州時屬雩都以丈田事民甚譁議者將臨以兵學海馳驛諭以利害悉解散翁源賊負險縱掠亟除之未幾歸孫奕祖孝友誠慤爲時長者

周子義字以方嘉靖四十四年進士選庶吉士授編修預修世宗實錄進南京國子司業神宗初大學士張居正枋政給事中余懋學上書論時政疏自南中來余故子義所取士由是居正銜之會奪情事起九列皆疏留子義戟手向堂上指曰此爲彝倫者何名也不爲動久之始移北累遷至吏部左侍郎掌詹事府屢疏乞歸未許而卒諡文恪

王鑑字汝明父問見儒林傳鑑嘉靖四十四年進士知武定州至則下教與諸曹掾誓曰若所不飭資緣爲姦利者官有常刑刺史所不自飭瘠吾民以自肥者神鑒如之郡伍伯以事揭府帖恫喝諸掾史鑑庭詰之語不遜立收之賦羨贖鍰商車稅餘悉貯以業無歸者會編役



鑑廉知猾良以次甲乙之一豪家積不受役鑑援筆首署其人叩首伏入爲戶部員外郎歷吏部稽勳郎中念父老謝病歸奉養不離側父歿久之進尙寶卿改南京鴻臚卿引年乞休進太僕卿致仕鑑亦善畫有言勝其父者遂終身不復作

明史附邵寶傳

華汝梅字鼎卿嘉靖四十年舉人歷仕博平息二縣廉慎執法而惠於民民應納紙贖貧者責輸一張省民資財萬計行取謝不赴攜素紙三籠蕭然歸

陳以忠字貞父隆慶元年舉人授甯鄉知縣至則丈民田斥兼并橋五潭江市有妖火以忠爲文讓城隍神一夕而滅遷甯州地多盜以忠陰使人說其魁盧尙賢率諸盜自首因捕其餘黨平之再起寶雞遷光州立稅法酋牛應魁者殺人而委其罪於怨家以忠具得其姦論如律以病免祀甯鄉名宦

唐裔字世卿隆慶二年進士授監察御史張居正枋國抗疏言權不可下移請收之出知汀州府自劾歸

施夢龍字伯雨隆慶二年進士知武定州興學勸農立社倉入爲南京戶部員外郎遷刑部郎中恤刑畿內有羣飲夜歸者四人共斃一人而獄辭以一下手重者論抵夢龍曰昏夜羣鬪何以辨下手輕重乃坐首斃者又富

無錫金匱縣志 卷十九  
民發得木偶而謂妻以蠱道殺已訟於官獄具夢龍疑其妾也召訊果服遂懲其夫而以罪妻者罪妄進江南副使備兵南饒歸

龔勉字子勤隆慶二年進士知嘉興縣再補吳橋皆廉明有治績進南京刑部主事累遷嘉興知府至浙江布政使歸時吳中困糧長役勉爲八議請於當事施行鄉人德之爲祠以祀之曰城南書院顧憲成爲之記

秦滂字伯雨隆慶三年恩貢爲劍州州判博學好古爲諸生講經義士爭師之歷署梓潼知縣巴州知州告歸祀

劍州名宦

見四川通志

施策字懋揚隆慶五年進士授禮部主事改南吏部考功司會有南北並計之命郎中闕策攝其事既核且嚴某事至尙書爲請不能得終養歸復補禮部在部九年釐定冊立藩封諸大典宗室某以乞恩壽千金不納遷尙寶卿再遷南太僕卿歸

吳汝倫字文叔隆慶五年進士除彰德府推官按抑趙藩及豪民鹺販者宜溝驛地連湯淇汝倫勘平之兩邑稱便擢禮科給事中未幾卒

秦燿字道明禾子隆慶五年進士選庶吉士改兵科給事中母喪起補刑科歷吏科都給事中燿會試出張居正

之門居正枋國頗操切諸官僚獨才燿燿於時政多所  
 陳奏居正戒之曰持論何過峻耶燿對曰當言則言爾  
 進太常少卿移光祿擢僉都御史巡撫南贛莅官甫三  
 日擒岑岡賊李佩傾其巢南雄妖僧李圓朗以白蓮符  
 翕眾起山谷間燿先期殪其魁而解散其眾進副都御  
 史巡撫湖廣會大旱疫道殣相望燿設法賑濟活數十  
 萬人尋為怨者所中坐削籍士論寃之汪琬明史擬稿附秦金傳  
 孫繼皋字以德萬歷二年進士第一除翰林院修撰遷少  
 詹事拜禮部右侍郎改吏部左侍郎時譴臺臣二十三  
 人繼皋奏言人材難得言路至重今一例廢黜尤駭觀

聽不報方閣部水火國本廢置繼皋列款疏陳會孝安  
 皇太后山陵帝稱疾不送又上疏極諫謂陛下即艱於  
 步猶可扶掖而行奈何即一時之安以虧大禮而蒙天  
 下萬世之譏議哉章上帝大不懌會有論者遂乞骸骨  
 歸卒贈禮部尚書明史附盧洪春傳

李應祥字善徵萬歷五年進士知臨海縣履畝丈田搜伏  
 稅為則而均之海倉險遠輸者以為苦應祥力請得改  
 折又出帑金市馬以紓牧養之困擢戶部主事歷郎中  
 進湖北僉事遷陝西參議調護礦事為民德尋調督學  
 卒於官

萬象春字仁甫萬曆五年進士選庶吉士授工科給事中  
皇女生詔戶部光祿寺各進銀十萬兩象春力諫不聽  
屢遷禮科都給事中鄭貴妃有盛寵而帝耽於酒象春  
因慈甯宮災疏諫報聞時宗室繁衍歲祿不繼象春議  
變通會豫撫褚鈇亦奏其事帝即命象春徧詣河南山  
西陝西諸王府計畫上便宜十五事多著爲令孟秋將  
享廟帝齋宿宮中象春言當在便殿不當在內寢已因  
災異言外吏貪殘不當遣緹騎逮問宮禁遂密不當宿  
重兵廷臣建言貶黜當敘遷內臣有犯當付外廷按治  
帝報問象春在諫垣久前後七十餘疏多關軍國計請  
復建文年號加景帝廟諡尤爲時所稱出爲山東參政  
定妖賊郭大通之亂進山西布政使拜副都御史巡撫  
山東倭躡朝鮮濱海郡邑悉戒嚴象春拊軍民供饋運  
應機立辦中使陳增以礦稅至象春疏論其害福山知  
縣韋國賢忤增被侵辱象春力保持之增劾國賢沮撓  
象春黨庇詔逮國賢奪象春俸遂引疾歸起南京工部  
右侍郎未上卒贈右都御史明史有傳

嚴一鵬字化卿萬曆五年進士由行人擢御史劾東廠太  
監張鯨置之法又劾湖廣稅監陳奉疏入奉始斂迹出  
按山東上疏請罷礦稅又條列礦監陳增贓私二百餘

萬帝大怒增以憂死又疏劾稅監馬堂隱匿臨清稅銀前後共一百三十萬因列其豪僭不法諸事追所匿以助工役一鵬故長者獨於彈擊中官不遺餘力巡方例一年而代一鵬至三年乃得請歸久之即家起大理丞歷南光祿卿遷通政使進刑部左侍郎未幾改北予告歸崇禎十一年年九十詔賜存問又踰年卒贈刑部尙書

汪琬明史擬稿有傳

吳之鵬萬歷五年進士任處州府推官仁而有斷平反甚

多公餘課士衡文人服其鑑以給諫徵

見處州府志

考乘云處州志作武進人考太學題名碑錄吳之鵬武進縣籍無錫縣人

錢景醕字琴箱原名如瑜萬歷元年舉人官太倉州學正

故事新進子弟必第其高下徵修脯景醕一切謝絕月

立期以課士貧者資之轉國子監博士終山東運同

倉州志

見太

侯先春字元甫萬歷八年進士除太常博士進吏科給事

中上轉漕五策救荒十策江南北饑議遣官給賑先春

言遣官徒擾民無益不若責成撫按以蠲抵賑如其數

便轉兵科歷吏科奉命閱視遼鎮乘傳從數騎驅馳叢

箐咨訪利病條上三十餘事劾罷大帥不職者補兵科

都給事中朝鮮倭變大臣經略彌年事解而議者欲留

兵以成先春疏言軍興之費不貲不宜復疲中國以奉  
 異域遼稅監高淮劾一大帥罷之先春言本朝鎮帥皆  
 廷推其不職者撫按交奏兵部議覆以俟宸斷今一橫  
 璫出中旨罷黜在廷無得議其可否如是將權日輕邊  
 事日棘必至禍國謫廣西按察使知事後贈太僕少卿  
 孫鼎鉉崇禎十年進士出漳浦黃道周之門授戶部主  
 事鼎革後僧服隱居湖濱華藏寺以歿

華廷詔字斗野萬曆十一年進士知龍泉縣政以教化為  
 先豈弟和平自奉寒素冰操凜然入覲過家鬻產以充  
 路費後卒於官民肖像祀之金鰲峰左見龍泉縣志

顧龍禎字翼卿萬曆十四年進士由行人擢御史嘗疏劾  
 權璫先遣家出都訣別以行乃自席藁待罪然竟得旨  
 黜璫巡按廣東稅監李鳳聲勢凌轢龍禎先誠屬吏不  
 得長刺庭謁而自與爭稅額半其數鳳無如何聽之又  
 采珠監李敬致大珠數顆龍禎肅然曰至尊所用其誰  
 敢私敬慚而退謫判曹州尋改夏縣卒於官

韓文字元質萬曆十四年進士知豐城縣學優行潔重士  
 撫民官終建昌知府見豐城縣志

沈學萬曆間舉人任渾源州學正下帷攻苦教思不倦每  
 聚諸生講論輒過丙夜見大同府志

楊應文字子修萬曆十七年進士累官刑科都給事中所  
上封事如繩澗藩停中使祛稅惡宥累臣皆持大體於  
妖言事論救諸諫臣尤力進南京太僕寺少卿予告歸  
周繼昌字文伯萬曆十七年進士除工部主事歷禮部郎  
中出爲湖廣僉事值王師征播召募齎送經畫得宜改  
命督學再補山西有雷生者以宗人株累幽於晉藩繼  
昌雪之王悟悉釋諸繫囚巡按康某以誑誤罪一生將  
殺之繼昌復力全之累遷南光祿少卿終順天府丞  
堵維垣字師甫萬曆二十年進士知南平縣再補江山稅  
璫檄採回青維垣上議採青本供燒造今土青黯淡無  
當禁物轉發江西勞費彌倍抑勒賠補民困乃大況資  
料產無定所差員發屋掘冢變出意外誰任其咎宜聽  
民自採折價解官時又稅間架維垣度不可爭請行有  
正稅以餘稅抵間架相當而止民便之仕終廣東右布  
政使

何棟如字子極祖汝健父湛之從父淳之皆進士有官聲  
棟如萬曆二十六年進士授襄陽府推官內璫陳奉開  
礦棗陽棟如察爲顯陵發脈地繪圖以上事乃寢璫多  
恣爪牙掠商民棟如悉禽治杖而投之江又繫二十人  
當以大辟璫流言激上怒逮棟如襄陽人赴闕訟寃不

聽後以星變釋歸天啟初起南兵部主事會遼陽陷棟如請自効遂募兵兩浙得壯士七千人甫至而廣甯又陷因請出關視形勢進太僕少卿充軍前贊畫以所募兵多逃亡為言者所劾復逮詔獄考掠幾絕久之成滁

陽崇禎初復職

明史附馮應京傳

顧應暘字太初萬曆二十五年舉人由教官累遷思恩知府思恩故土府改流轄九司歷駱連暗山諸箐以達邕管皆猺窟蟠互應暘履視形要治塹垣鑿磴置候為輿騎通塗教田者車漑法而請除其雜色鹽牛稅杖殺巨憝之倚峒酋為暴者蠻俗帖然以績最擢蒼梧道未幾

移疾歸

張維斗字上台萬曆二十八年舉人知榮涇縣時天全土司楊氏高氏構難高避城中楊舉兵索之維斗折以大義而退及去任高厚饋不受乃銀鑄維斗像祀焉元孫國鼎以監生考授州同知嘗割股療父疾

華元禔字爾遐萬曆三十二年進士知新鄭縣調商邱以江南法區分其地為一百七十有三給牛置屯募荒民設助墾之法稽其積散而賞罰之治最伊洛間擢御史以母老告歸祀新鄭商邱名宦

周炳謨字仲觀子義子萬曆三十二年進士選庶吉士授



翰林檢討疏請儲學不宜久曠春講不宜再稽進左贊善上言兵事累數千言遷諭德時值三大喪禮文典冊

多與參咨熹宗卽位累官禮部侍郎奉命修光宗實錄書成進服俸載三案事直筆無所阿忤魏璫炳謨典試

武闈所取士許顯純者請介紹於璫炳謨厲聲拒之卽日告歸逆黨御史石三畏因劾所纂實錄非實削職而

炳謨已卒崇禎初贈禮部尙書追諡文簡

明史附文震孟傳

鮑際明字伯參萬曆三十二年進士知海康縣地震城圯而欽州以變告際明慰撫部署民以無恐調同安獎植

寒士補上猶再調甯都清郵傳籍姦胥有以偽篆注銷

蝕帑者治如律祀四邑名宦孫鳳儀樂安知縣亦有聲秦延默字允言金曾孫萬曆中選貢授湯溪知縣簡靜不

擾民懷其德祀名宦從弟延丞以進士知永豐縣著循聲厯官兵部主事祀永豐名宦從子重泰以舉人知長

樂縣黜姦胥懲豪右平反疑獄禁絕公斂士民生祀之施學淵萬曆三十四年貢生授富陽縣丞子諒儒雅吏民

愛服

見杭州府志

浦禎字吉夫萬曆中拔貢生授泰安州同知革官馬鎗手降劇盜泰安民生祠之遷判夔州有劫盜殺儒官立殲

其黨屬獠懷化任滿歸

華敦復字雍明萬曆三十五年進士分巡溫處性簡約杜絕饋遺屬吏不敢以片楮入門歲大旱素衣步禱烈日中行數十里幾二旬卒得雨擢四川布政使時有議加派蜀糧銀六十萬者以去就爭之得寢祀溫處名宦

賈允元字方蕘萬曆三十八年進士授行人歷禮部郎中時營慶陵宦官利稽役詭言珉礎未具需以三年允元上言古者天子七月而葬近考世穆兩朝無或過焉乞敕山陵使不得以石料為解臣惟元宮舊制石頂固宜加慎而樸素渾堅雅合先帝儉德不必過為雕飾報可累擢浙江參政平劇盜王錦王鐘等終山東按察使

馬希尹字惟任濂子萬曆中以貢為太倉訓導往時州大夫朔望行學諸生環列言事希尹切戒之遂革其習務以忠孝廉讓相砥礪入學田租而歸其贏於公丁祭遺胙肉或易價以濟貧士遷平樂府教授尋歸以文行為鄉黨師葉茂才嘗念其貧遺以金襲之笥五年卒還之壽逾大耋而歿

太倉州志有傳

沈應時字伯起父病瞽應時為之舐目伺父寢則篝燈夜讀萬曆四十一年進士授吉安府推官歸養補岳州擢兵科給事中歷禮戶二科具疏昌言三案以年例遷陝西僉事罷歸崇禎初起家添注通政時邊報旁午京師

震動應時上戰守諸議會督餉使臣十道俱出應時銜命星馳受事卒於京口

施元徵字泰先策孫萬曆四十七年進士崇禎初官南助教上擊瑞薦賢二疏進副職方郎攝督捕領十八營有警備功遷武選司郎中擢湖廣副使母喪歸起福建副使兼右參議會海寇肆掠有前鋒曾旺者短而悍元徵授計海防劉某生得之隨分兵三路夾擊復以一軍截歸路賊窮乞命乃戮其渠四十六人而免其餘首尾僅七日賊平尋入都中流言下獄事白還原官京城陷遂歸從第匪躬由歲貢生署宜興訓導有豪右誣孀婦姦

賄匪躬關說匪躬卻金而白孀婦寃

陳振豪字子出萬曆四十七年進士知蕭山縣遷刑部主事以承審劉鐸事忤魏闈左遷起戶部員外郎出爲南陽知府宗室器圻疏訐唐王陰事下巡按御史檄振豪驗實振豪言事屬聲影未可信事得寢亡何王府典仗呂調陽姦部軍妻而殺其夫振豪持法杖調陽王以是銜振豪是時河北賊警日至而南陽兵少及寇陷修武又調防河北所留僅百餘人隊不成列而賊乘河冰南渡振豪時攝南汝道集所募鄉保壯勇乘城障王方塞城四門民避寇至不得入振豪力請開門單騎出勞軍

辨士著納其老弱而簡壯健編關廂協守城賊知有備突走諸屬縣振豪復爲聲援於是南陽十三城皆得完王積與振豪不協以有功轉忌之訐振豪乾沒修城工銀罪按治不實得旨鐫級又奏杖呂調陽事詔逮繫獄禮部侍郎陳子壯疏救不報久之釋歸

劉明翰字羽戢父元珍見儒林傳明翰萬曆四十三年舉人崇禎中授中書舍人定邸出閣明翰爲講官會賊報狎至召對文華殿請東宮或定永二王南行格於廷議及都城失守南歸省母屏居三年卒

王永吉字曼修天啟二年進士知定興縣奉聖夫人客氏

家定興徒屬橫鄉邑永吉持法無撓屈客有喪監司以下奔走其門永吉獨不往遷南京禮部主事崇禎初大姦旣殛餘孽未除永吉抗疏劾禮部尙書王永光以稱功頌德之剩姦爲逆璫兒孫之護法始則戢翼搖尾附公論以求容旣乃露爪張牙持言路以樹敵疏上出知福州府受事二十七日罷去久之以黃道周薦復起福州甫匝月投劾歸再起金華不赴

邵名世字翼興天啟二年進士除南京兵部主事歷官參議督學雲南嘗攝按察使事臨安有僧私其鄰人之妻者潛斃一商而誣其夫以殺人獄上名世鞫訊得實坐

僧而釋其鄰進福建副使終山東右布政使有名世所  
劾去吏不二年以邊材至巡撫山東者日夜伺名世短  
長竟無所得

秦垞字器新天啟二年進士知澤州父喪歸補福甯州輸  
賦令民自封屬邑解餉許竟達藩司決獄以開喻得情  
不以恫喝入為戶部員外郎管京糧廳宦官張彝憲以  
督理戶工二部至屬視諸曹郎金鉉抗疏論劾馮元颺  
索馬徑去而垞及何楷與慷慨講分庭禮璫意大忤垞  
亦遂歸晚居東皋以終

張有譽字誰譽天啟二年進士授戶部主事權稅刑關獨

不拜魏忠賢祠出知饒州府擢參政總理七省漕儲經  
畫節省具有成績遷四川按察使癸未大計舉清廉第  
一帝為手書其名於屏風累官戶部尚書太子太保江  
南亡棄官歸幅巾藜杖與緇素遊自號大圓居士

案有譽曾祖輔由邑王祁村徙江陰之青陽而世居世  
墓並在無錫故志外雖議去此傳今仍從前志錄之

張纘曾字公緒選曾孫崇禎元年進士授行人兩奉使命  
擢南考功帝親改為御史一載封事十九上巡視東城  
不畏強禦疏糾時相著直聲授浙江道巡按河南卒

曹荃字元宰崇禎元年進士授南京刑部主事歷郎中偕  
禮部周鏞言事忤權要謫官歸久之除知漳州府清而

不刻吏民畏懷遷副使時中原鼎沸荃數勸鄭之龍舉兵勤王既而見鄭逗留不行遂投劾歸

胡之竑字翼在崇禎元年進士仕至山東副使嘗權稅九江以例得羨餘三千金賑恤饑貧民德之長洲徐枋誌其墓著有禹貢註解

蔣元敬字介如萬曆三十七年舉人崇禎初知平江縣冰檠自持釐剔奸弊凡徵收火耗趨運雜派一切無名錢悉罷除之建義冢葺公署政績多有可紀入通志舊祀平江名宦

吳其馴字永調崇禎四年進士由蘇州府教授歷職方主事理驗軍廳汰冒餉清尺籍進員外郎京師戒嚴上書言備禦之要尋以足疾歸

陳組綬字伯玉崇禎七年進士授兵部職方主事組綬少有成名留心經世學官兵曹後嘗倣春秋例自校定職方圖凡關郡之險莫不了然於胸時邊患告急抗疏請備兵要處以固京師當事不能用尋病卒

案組綬世家無錫其父始遷武進組綬嘗為人作序仍自署無錫歿後歸葬

王永積字穉實崇禎七年進士知武定州 大兵破濟南山東郡縣望風瓦解武定被圍永積以民兵六千登陴堅守且半年獨得不破尋以考察黜巡按御史疏永積

功起兵部職方司協贊員外郎考察復官自永積始李自成猖獗漸逼京師永積上疏陳堵截之方進郎中有宦官爲其弟賂求浙鎮者永積卻之尋罷歸

胡時忠字伯昭崇禎十年進士原名時亨恥與光時亨同名疏改除南昌府推官釋東鄉舉人艾南英繫復萬載誣誤諸生二十三人名定萬年金谿諸邑民變時會討土賊李肅十等時忠承檄監軍旣而道官遁遂攝其事賊首旣誅時忠拊循餘黨收卹子女賑流冗瘞枯骨於是困者悉安民立祠祀之尋擢監察御史

徐調元字爾贊崇禎十年進士授黃岡知縣時流賊勢方熾城中無兵調元募壯勇固守賊攻圍一月遁去父喪歸起補金華東陽諸生許都作亂破東陽義烏浦江署僞令所在應之都以宣大故帥房大成爲謀主調元探其潛至城下邀與計事設供帳迎之別館大成不疑明日議事府治立縛大成斬以徇賊眾掩至城守固遂四散剽掠乃率諸將夾擊之一鼓破賊禽斬渠帥蕩其巢穴赦其妻子論功撫按交薦之有旨召用南都時被劾下刑部尋脫歸

華畹綸字紱韋崇禎間歲貢知醴陵縣幹濟有才略獻賊陷長沙督師何騰蛟檄同知府事未幾闖賊餘黨逼湘

陰知府周二南赴援死之比賊降督師將統軍東下而道殣相望軍餉不繼乃擢晚綸為長沙知府先是靖南軍進勦巴黔責郡屬作長堤湖上以利師行民皆惴恐晚綸度洞庭深險堤不可成易以鐵索連巨艦實土覆板為浮橋以濟後大兵壓長沙督師嬰城固守晚綸以城中乏食請止留精銳出婦女老幼聽其逃生歡聲震野督師復令晚綸徵餉他郡去將還長沙失守督師走保衡永晚綸於事定後歸家卒

見長沙府志

無錫金匱縣志卷十九終

無錫金匱縣志卷二十

官望

國朝

顧鏞字常孟順治四年進士授戶部主事歷郎中出為興化知府興化邊海亂後苦寇盜備弛而役困鏞至稽舊法密植巨木椿於三江汎環之若城復置營舍於楓亭驛要口驛莆仙交割所也籍漁船刷蠹冒盜息役平官至廣東僉事道會奏銷案起註誤歸

吳達字章甫明舉人起工部主事會有議新令不便者奉嚴旨敢再言者死達獨疏論辨竟寢不問尋屆考選策問



勦撫江西事狀達直言勦撫兩失特擢御史達遂上天  
心民命疏直聲大振出按山東有東土大勢疏復陳禦  
賊安民治標八略按湖廣有南楚情形疏按陝西偵知  
鎮弁漁利茶馬滯缺狀將馳奏鎮帥懼立掣弁回邊市  
大蕃奉

命還京卽上知人第一急務疏直斥枋臣洪承疇及尙書  
高爾儼臃腫銓途稍降行人浹歲仍還前職累進通政  
使爲論者所中戍邊

薛信辰字侯執順治六年進士除潮州知府潮州守將郝  
尙久有異志信辰屢密陳於上官及旣叛信辰被執將  
授以僞巡道不從而遣其子潛出約總兵吳六奇率師  
攻城而已爲內應其啟上官密牋爲郝兵所得報尙久  
尙久大會文武縛信辰至命斬之潮之士民羣泣請命  
乃繫獄家屬投井仰藥死者五人凡四閱月事平得釋  
還職仕終浙江右布政使

費國瑄字子復順治六年進士知餘杭縣首捐竹稅免絹  
解山寇亂身先士卒討平之民戴其德爲立生祠擢兵  
部主事以強項不能俯仰自劾歸

朱瑛字晉白順治六年進士知常甯縣時湖南初向化民  
流土荒瑛勞來安集歸者忘亡粵兵來擾洪承疇方爲

督師瑛籌備供億具著機略擢寶慶同知承疇特疏薦之瑛竟以親老歸

顧煜字銘柏順治六年進士知象山縣革弊政祛蠹吏練兵卻寇履畝平徭設觀瀾社課諸生禱雨兩應詛虎虎去邑大治以失上官意論罷

侯杲字霓峰順治六年進士知宣平縣宣平民貧多逋賦杲輸家貲補之辦軍興供億未嘗擾民亦不廢事遷禮部主事擢郎中改刑部督九江關清慎奉公悉罷額外征商旅德之丁外艱歸遂不出

張允欽字臣若順治九年進士授太常博士遷工部主事

歷郎中督江南江西湖廣蘆政潔已奉公擢翰林院侍讀以誑誤去官

顧龍裳字稚龍順治九年歲貢生授蒙城訓導擢孝感知縣有惠政祀名宦著有世德詩鈔

秦鉞字克繩順治十二年會試第一廷對第三人

召見南海子賜袍服比第一人授國史院編修充戊戌會試分考官大學士合肥李天馥其所取士也旋出爲廣東參議分守雷州遷杭嚴兵備副使嘗有告無爲邪教者鉞問知此曹戒食肉飲酒遂集之堂下遍與酒肉飲食訖散遣之遷榆林參政旋擢江西按察使進賢縣有

無錫金匱縣志 卷二十一  
三  
叛人江德八者久未獲而所司得江國八鍛鍊誣服弑  
察其非亟請上官奏釋之未幾卒獲德八伏誅又數人  
詐稱旗兵取人財例當與盜同罪而操舟人徐昂者不  
得財弑當昂盜未得財律減死部議坐失出降調久之  
補長蘆運使遷湖廣糧儲參政會裁缺歸子汝泌字鄴  
仙官虹縣教諭能詩書兼米趙又嘗作服議一篇可補  
陳氏禮書

嵇永福字爾遐順治十二年進士授嚴州府推官降歷城  
縣丞督師蔡毓榮辟入幕府主機宜文字康熙戊午以  
博學鴻詞薦報罷後軍功議敘以僉事道用未補官而  
歿孫炎由諸生薦舉材能知儀封縣性簡傲罷歸炎從  
子承烈官平陽縣丞以善捕海盜擢黃巖知縣  
過松齡字佺期順治十二年進士授鎮江教授己亥海寇  
突至官弁皆匿松齡獨抱印不去曰吾一介書生當與  
此共存亡耳事平進服俸稍後有太和教諭吳人秀壽  
州訓導丁濟美並著清德

顧岱字商若順治十五年進士授銅仁府推官遷思南同  
知約束悍兵苗民德之尋擢雲南武定軍民府知府調  
潞安復左遷贛州同知值三逆犯順閩粵楚三方兵火  
相接岱隨機應變倉卒立辦時用軍興法督撫提鎮皆

得專殺岱悉力拯救多所全活軍中獲陷賊者數十人帥欲盡誅以威眾守道欲生之議相左岱趨而前曰將軍議是然其中有可用者請釋之因趨廷下閱囚謬曰是皆能技作者即令釋縛免者二十五人又釋繫囚贖女口無算遷袁州知府丁艱歸起補杭州府罷歸岱才氣卓越官雲貴時吳三桂獨器重之岱不爲用其調山西三桂欲奏留岱固辭乃免孫預舉人歷官大理知府仁慈寬厚多惠政贄別有傳

華亦祥字纘長順治十六年進士第二人授編修辛丑充會試分考官尋遷侍讀未幾卒方江南以抗糧事逮諸

士人至京至委頓有道斃者亦祥陰爲左右而資之歸亦祥事親至孝內行淳備歿時無以殮其同年崑山徐元文葉方藹爲之經紀其喪

鄒象雍字蕤宮順治十六年進士知武陟縣中州賦法田輕丁重豪弱偏枯不平象雍彙算配撥請定分等則例具申得報可遂著令通行全省便之屬大兵赴楚粵駐軍懷慶象雍詣大帥正色請申約束居民安堵仕終行人司祀河南名宦

曹鼎臣字掄生順治十五年會試副榜授無爲州學正遷奉化知縣康熙初三逆蠢動土寇蠶起蔓延餘姚上虞

新昌嵯鄞慈谿奉化諸邑境鼎臣團練鄉壯會七邑勦  
平之上官索賂不應抑其功弗敘踰年授中書科中書  
奉化民爲刊勦寇錄行世

華章志字惟貞順治十六年進士由戶部主事遷刑部郎  
中擢貴州提學僉事振興文教士林悅服歿於官祀名  
宦

張浩字鶴昭由拔貢知宜春縣廉明善斷兵燹後圖籍焚  
燬田糧收除朦混浩立局按查令民各自呈報賦稅得  
實嗣是民有定賦

見江西通志

秦松如字亦仙松齡弟知吳川縣廣東自軍興民散餉急

而道益積松如議新集不任帶徵條上利害請遂蠲之  
大拂時指罷官歸後十年乃如所請粵人追感其德立  
祠祀之

見廣東通志

張翔副貢生康熙元年知永川縣無官廨僑寓松子澗城  
中戶口零落翔悉心招徠在任三年流民大集祀名宦

施剿曾字維遷康熙五年舉人爲全椒教諭遷奉化知縣  
奉化濱海魚鹽估舶交集畧商籠官長爲姦利剿曾下  
車肅然屏息巡撫張鵬翮疏薦之歷戶刑兩部郎中

季麒光字聖昭康熙十五年進士知閩清縣移諸羅時臺  
灣甫入版圖設郡縣諸羅以新闢之邑諸所措置規畫

日無甯晷嘗條議事宜上大府一郡賴之

見臺灣志

秦松華字瀛仙父德湛見隱逸傳松華由歲貢生官筠連知縣既莅境有里長挾貲以迎具言縣官日用所需均取給於此松華亟揮之去比視事里長又斂錢固請松華又峻拒之自是不敢復言每歲遣二健僕走數千里取金於家以自給時蜀遭獻賊亂後瘡痍未復松華勸民耕作多所開墾復進士於官舍親爲講畫人以嚮學卒於官喪歸士民素衣涉江遠送祀筠連名宦

高洪字仙令康熙二十年舉人知遵義縣清介不苟取自奉儉苦幕客家人悉辭去莅事精敏判決如流俗多告訐人命官檢驗卽破家洪簡役從詣尸所檢不實立懲告者自後命案用稀力行保甲法勤於勸課而紳士占役希優免皆不聽坐是得怨總督年羹堯亦惡洪耿執劾去之然重其才乃延入幕府待以賓禮久之將復薦起洪遽歸無何羹堯敗

邵璿字虞在拔貢生知芮城縣徵爲工部郎擢御史掌登聞鼓院康熙六十年與同官秦天錫等抗疏言建儲事從軍西塞歲餘卒予祭葬復原官璿工詩其出塞諸篇悲壯可誦子建徵字鳳倫雍正五年舉材能科知灌縣其地夷虜雜處盜賊間作建徵日夜徼巡閭閻不擾上

官將保薦解組歸

楊銘敦字鍾衡由歲貢教習知湯陰縣邑故河北孔道會征澤旺到官卽判差過兵車馬芻粟踵至立應而民晏然旣而檄赴軍前跨鞍疾馳謁大帥撥管肅州雙井站插羽報辦動適事機再厯歲還湯陰前後十一年邑罹旱者三之二自句當給軍外卽措置賑災活民無算以是傾其家貲且以當早寢徵罷官歸銘敦好學嘗從毘陵金敞及顧培遊

侯文煊字浴日康熙二十三年舉人授長洲教諭

選舉表作吳縣

頻歲饑疫設粥廠手調湯藥全活無算

見蘇州府志

邊脩字洪撰康熙二十三年舉人知海城縣縣雜籍旂民帥弁挾勢要有所構率軍勝而民失直脩至持法不撓民氣大伸在官七年幾致刑措創他山書院以課士由是甲乙科踵起爲遼海望時高安朱軾方尹奉天曰邊海城乃非俗吏進部主事監海運倉刷弊如滌老胥目笑之號癡主事

王世濟字貽京康熙二十九年舉人知雩都縣時江西被兵久田野荒蕪至是稍生聚報漏稅者累至吏私進曰據報清勘升降可以增額世濟叱之曰寬大之世以我隘其生耶間數日他吏又以其說進叱如初厯任四年

世濟最慎民命卒以失法官意罷歸  
陳大經字筠操康熙中遊京師一滿洲巨公爲注選籍得甯津縣到官不設轉斗訟者直造衙齋立剖曲直去久之民隱無弗聞農時躡芒履親視播插民忘其官值歲凶屏去催租版輒散官穀大吏將揭參卽自投獄倚虎門決事民日號哭大吏轅得鐫職留任民懼躍趨獄昇出之無何歿於官民爭築土作廟祀之時有吳遵錫以副貢知內江縣亦勤敏有聲

薛祿天字二宜康熙四十二年進士授長壽知縣遷石屏知州憂歸補簡州所至有能聲其同年進士朱琬歷任

聊縣新津臨安知縣皆不久於官而多惠政  
施燾字對揚康熙四十五年進士歷刑部郎中燾號強項有貴人子悅一衣工婦數挑之不從陰使僕斃工事露獄具貴人行千金至燾所燾笑拒之而當其子罪黃某者倚勢脅人金且數萬人不勝忿訴所司諸司皆中其賂獨燾不可竟以獄上立寘黃於法歲餘怨者撫他事論燾浮躁休致歸

嵇曾筠字松友父永仁見流寓傳曾筠康熙四十五年進士選庶吉士累進僉都御史典試河南還奏貯穀理漕防河三事未幾河決中牟卽遣監視堵築隨又條上河



工便宜授副總河督豫河事務累進吏兵二部尚書專河道總督任加太子太保太子太傅拜文華殿大學士卒贈少保諡文敏曾筠負經濟大略知人善任恭慎廉明累用引河殺險法前後節省庫帑不下百萬其生平勞績治河爲大與靳輔齊蘇勒並稱名臣合祀於清江浦嘗董浙江塘工於海甯築尖山壩以殺潮勢又建魚鱗大石塘七千四百餘丈至今賴之入祀浙江賢良祠又祀之西湖范公祠范公者前總督范承謨曾筠父永仁嘗從之同殉耿逆之難者也子璜自有傳瑛副貢生歷官廣南知府璉舉人歷官湖北武漢黃德道皆有聲致國子生官永昌知府勦鎮康賊獲頭目三十餘人撫其脅從者邊境以安

顧開陸字元臣父貞觀見文苑傳開陸康熙四十五年進士知永寧縣值歲旱開陸多穿渠引洛水灌田民賴以活調遵義遵義地介黔而隸蜀黔民掠賣幼苗多徒黨而謀報歧迂開陸設法爲置巡緝其後遵義改隸黔民吏稱便皆由開陸倡議官終澤州同知

黃天球字璋伍康熙五十一年進士知靖安縣靖民多瘠首豁積逋賦籍開除細戶立飭清釐土田嚴革換段僞契及殺人沈命徙屍諸大弊吏胥不敢因緣爲姦有兄

無錫金匱縣志 卷二十一  
弟構訟久不決天球曉以天倫大義皆涕泣引罪明蘇  
州知府況鍾故靖安人也特建祠祀之尋擢禮部主事  
告歸

顧仔字子肩父焜孝友誠篤訓導安東頽廢具舉遷溧陽  
教諭謝歸仔康熙五十七年進士官編修督學廣東振  
夙習釐弊竇進秩中允旋移浙江持法不少借士氣整  
肅而亦以此取時忌還朝尋子假歸子維鈞進士由知  
縣遷刑部主事植品嚴峻勤於服官

陶正中字田見雍正元年進士由編修遷御史巡察近畿  
畿內多宗人田越屯爲暴正中請以法繩之勢遂戢豪  
民殺傭欲私其婦婦逸訴豪錮婦於獄七年正中廉得  
之卒抵豪罪擢廣東糧驛道徙任天津時旱暵迭告而  
析津爲漳滹沱下流又患水正中建言疏子牙河濬淀  
泊卽藉其土築堤捍之使淫水有歸遷直隸按察使尋  
擢山西布政使於時人尙操切正中獨持以鎮靜左遷  
直隸清河道卒從弟履中字叔和工爲詩

潘果字師仲雍正元年進士知宜章縣俗健訟而多盜果  
聽斷明恕擒盜魁置諸法境內肅然又禁諸淫祀悉毀  
其祠宇改造義學及節孝祠三堡屯田久編歸民田冊  
而軍戶輸賦如故請免之擢辰州府永順同知坐事罷

歸杜門讀書教授弟子深於易學並工詩古文  
顧贄字敬輿岱孫父起佐性絕俗嘗從宜興湯之錡講學  
贄雍正二年進士由編修改御史督糧山東運丁積壅  
舊欠山東爲最至二萬石有奇故事交存贏米官給半  
價贄請倉督以贏抵欠以半當全由是銷欠幾及二萬  
石旋解職歸起補重慶知府重慶屬有趙姓二悍役脅  
人錢致夫妻母子四人死州吏當其怨家罪磔贄廉其  
冤訊得實以所當罪罪二役州人稱快官終四川鹽驛  
副使弟維高才生以詩名  
鄒一桂字元袞雍正五年進士由編修改御史督學貴州

乾隆七年遷禮科給事中初衡陽知縣李澎等倚巡撫  
許容浮收賦額糧道謝濟世發其奸爲容誣劾既覆讞  
得實奪容職未幾仍  
命巡撫湖北一桂疏爭謂容不宜復用乃罷遷太常少卿  
奏律載獄具全圖俱有定式毋許非刑乃今直省新制  
無論獄囚多寡概令排頭仰臥於腳鐐手梏之中橫穿  
長木鎖逼兩端多緣致斃宜下各督撫嚴禁從之累遷  
大理卿平反重獄脫死罪二人歷內閣學士禮部侍郎  
以年老仍調閣學致仕歸再入都祝  
釐與九老會在籍食俸卒贈尙書銜予祭葬年八十七一

桂工畫亦有名於時

錢基雍正二年順天舉人知巫山縣捐俸勸修書院籌膏

火為久長計士民德之祀名宦

見四川通志

陳士雋雍正四年順天舉人知崇甯縣脩文廟建書院作

育人才設棲流所普濟堂以養孤貧祀名宦

見四川通志

秦甸字中馭少為諸生讀書有根柢雍正五年進士授濰

縣知縣慈祥愛民不施鞭扑民以老佛呼之入為刑部

主事行橐惟山繭數匹而已從弟蕙田方官侍郎時無

迴避之例每日上堂呈稿蕙田拱立以俟甸執禮維謹

見者以為難

嵇璜字尚佐曾筠子雍正八年進士選庶吉士累官至文

淵閣大學士璜習於經世之務尤善治河歷南河東河

河道總督皆著聲績如其父為人襟柔中剛不肯矯激

沽名而內自確然有守遇

召對時有陳奏不以告人既陟綸扉屢以年老乞身不許

上累賜詩章以文彥博目之乾隆庚戌重與瓊林宴年八

十四卒贈太子太師諡文恭璜故工書子承謙翰林侍

講承豫兵部郎中並以書名承羣東昌知府有政聲族

子承志由舉人歷長蘆運使

上廉其家世長於治河超擢河東河道總督會河決衡家

樓承志督理畚築事宜勞瘁成疾入爲順天府府尹以  
歿

侯嗣達字爾端雍正八年進士授刑部主事由郎中擢御  
史進呈易經泰卦講義

召見奏各省保題人員毋得專尙才吏以清治源報可外  
擢湖南衡永郴桂道撫治苗疆規畫有方移福建汀漳  
龍道以迴避改浙江甯紹台道卒於官

孫濂字山傳雍正八年進士授靖安知縣當官獨立不阿  
江西州縣有漕者四十八南昌水次倉七十二有監司  
與旂丁比倡議當徙倉瑞洪可省兌費瑞洪瀕湖無障

障歲虞漂泛且爲劫盜招濂起爭之謂倉萬不可徙又  
或議剝水腳費旣轉請且檄行濂列陳不可於大府凡  
數千言大要謂墜給募運病在官官不能應勢且斂船  
勒夫病究在民語甚激烈於是二議皆得寢甫四載卒  
於官監司以下遠近吏民赴弔者填街巷皆涕下

秦仁字體國由副貢生舉茂異科知蒙自縣治漢獮有法  
會普思不靖仁嚴設戒備邑境帖然移東阿擢知福甯  
府皆有殊政仁少孤奉母至孝事兄秉丰尤篤倫誼子  
雲錦諸生清釐先人家墓著秦氏先城攷

華恒泰字與生乾隆元年在進士授直隸新城知縣廉潔不

名一錢以事至鄉與百姓語煦煦嫗嫗忘爲長吏也改  
教職歸貧至不能自存從弟西植由舉人知貴溪縣亦  
有清望告歸後年九十二始卒

賈霖字沛然乾隆元年進士授靈壽知縣有德政先是陸  
清獻隴其宰靈壽時山出一泉民稱陸公泉迨霖至復  
出一泉民稱爲賈公泉以憂去官終甯國府教授霖幼  
負異稟工於詩

顧澐字克家以諸生薦授福山知縣調單縣單民輕生小  
忿輒以死相傾陷利株染澐遇事立斷一無波逮姦民  
失所圖俗遂革遷知濱州請豁謙地通糧迂制府意會

又有墾荒令濱獨無所報趣之澐曰甯去官無病此土  
遂假他事落職歸澐工文書法尤渾勁

秦勇均字健資乾隆四年進士第三人授編修出知九江  
府俗好訟勇均遇事反復開譬不施笞責而事多寢息  
移廣信親詣鷺湖書院與諸生講學歲旱未奉檄先發  
粟平糶幾被譴丁憂服除起爲平陽知府久之擢陝西  
按察使條奏刑律輒報可執法持平告病歸卒於商州  
周金紳字大階乾隆四年進士知新甯縣崇文廟葺書院  
修邑志鹽總某餽白金欲專鹽利金紳叱還之聽訟明  
允以疾卒官祀名宦著有握蘭詩草四卷

張泰開字履安乾隆七年進士選庶吉士入直  
上書房授職不數年洊陟卿貳晉禮部尙書兼都察院左  
都御史嘗以胡中藻獄牽連被逮

高宗知泰開忠謹卒賁之以病乞歸加太子少傅卒年八  
十有六諡文恪

鄒雲城字擁書乾隆三年舉人任元城知縣元城濱河地  
勢窪下雲城豫治堤堰及秋水大至元城獨完擢知深  
州首革陋規民大服時鄰縣災富商囤積居奇民憤將  
成大獄雲城奉檄往勘事得平擢知河間府子儀字補  
山舉人知雲都縣免沙積地糧益書院膏火士民德之

侯順天府治中健清泉知縣皆著惠政

侯鈞字嗣沂乾隆十年進士歷任陝西知縣屏供億杜苞  
苴嘗修三賢祠三賢者燕伋郭欽段秀實也其在武功  
會有念佛聚眾之獄上官將治以邪教鈞廉得其實曰  
此愚民求福耳省釋甚眾

周照字南愷乾隆十三年進士授戶部主事遷員外郎郎  
中擢監察御史奏言河南歲饑請飭有司實心賑濟會  
日食應

詔條陳時事乞勿用新進喜事及言利之臣退而自焚其  
橐丁母憂歸邁疾卒

王瑛曾字玉裁乾隆九年舉人知鳳山縣時生番出掠單騎入其境諭止之嘗於臺灣民家得偽印例遷秩而臺灣令應降調瑛曾瞿然曰人黜我陟胡可居也旋擢黃平知州以勞卒官祀鳳山名宦

侯錦雲字升巖乾隆九年順天舉人知河津縣值歲稔錦雲悉發倉穀以貸民同官皆危之明年歲豐民悉還穀於倉無後者以母老乞養歸

秦鏐字廣和乾隆十二年舉人爲人沈毅有定力由湘潭知縣遷歸州知州甫三月聞父訃時方按捕巨盜張仁貴等之獄旣成獻臺司護前過堅持不可勢且反坐鏐聞之從叔尙書蕙田尙書入告

上命大臣鞠治之誅張仁貴等臺司皆獲罪鏐累遷至湖北按察使降長蘆鹽運使終刑部郎中弟鑽才亞於兄由翰林出歷廣東鹽運使鏐子泉以編修改吏部主事潮官國子司業視學安徽有清名湘舉人署大竹縣鄰境叛兵侵擾湘嚴守得安授合江設四鄉義學置田千畝積穀備凶荒以病歸

鄒應元字清源乾隆十六年進士授武甯知縣累遷至杭州知府所至皆有遺愛特調臺灣知府臺灣懸隔大海應元甫至賊黃教聚黨數千人謀爲逆應元出金募健



兒三百人勦捕之得其死力縛其渠誅之賊遂平凡在  
臺灣六年以病免歸

丁鶴起字乾九父詮歲貢生官安慶訓導嘗爲諸生申雪  
冤枉雅有聲譽鶴起由國子生効用南河爲嵇文敏曾  
筠所器授主簿累遷至安慶同知其令陳留最久償積  
逋慎庶獄飛蝗過境下令捕之蝗抱穗死去官日民多  
泣送其他治蹟皆類此從弟王士舉人好爲詩歷官松  
谿漳浦知縣有惠愛

丁亭字中臺鶴起子乾隆十五年舉人由長甯知縣累擢  
贛州知府權吉南道終高州知府長甯民兄弟爭產亭  
諭之皆感泣讓其資以建橋曰聯氣橋知瓊州時生黎  
弄兵射殺巡檢某亭募嚮導借總兵冒瘴霧疾馳縛其  
渠及黨百餘人以歸事乃定弟尹志雲銘尹志別有傳  
雲銘知藤縣亦有聲

侯可儀字于達乾隆十五年副貢生知新化龍山等縣以  
奉母歸母石年九十曲盡孝養服闋知五河縣祀名宦  
爲政務靜化不事鞭扑宦橐蕭然子鈐字鍵六進士知  
安仁衡山等縣廉愛有父風鈐兄大鏞弟鏗皆知名族  
孫叔度煜並從鏗學有聲庠序

華雲鵬字古愚乾隆十七年進士由部曹出爲嚴州知府

性端重不阿上官子申伯改名翊舉人榜姓王歷任太  
和祁門吉水知縣廉介自守告歸家無一椽

顧光旭字華暘乾隆十七年進士授戶部主事累擢監察  
御史屬直隸山東大水光旭奏請以工代賑並借給牛  
具籽種以資耕作報可出爲甯夏知府調平涼值歲旱  
請開賑與布政使忤而光旭竟先發銀米民得無饑陝  
甘總督文綬移任四川時方有金川軍事文綬奏請以  
光旭隨往署四川按察使蜀有失業奸民俗名囑魯子  
者四出劫掠光旭督役搜捕獲其眾懲治之羽黨股慄  
誓改悔尋以秋讞失出罷歸光旭學術純正工於詩尤

精書法居官有清操歸主講東林十餘年卒子永之舉  
人挑發河南決獄平恕而伉直如父湛之國子生葆之  
歲貢生沛縣訓導皆有學行

錢曜字震暘乾隆十七年舉人授象山知縣曜胷無城府  
爲政廉而愛民如子旣罷歸仍教授鄉里以自給故家  
邑之馬橋讀書課子足不入城市年七十五卒

周際清字思順乾隆十九年與杜玉林同舉進士同官刑  
部兩人並諳律例爲尙書秦蕙田所器玉林出外官四  
川鹽茶道方金川用兵佐理軍儲累遷至刑部侍郎而  
際清官終永昌知府際清幼時父遠出絕音耗母撫之

成立迨登第始迎父歸而母尋卒際清性孝友與兩弟同居不析箸衣服飲食必均玉林字寶樹嘗以事譴戍釋歸歿於嘉峪關

鄒奕孝字念喬祖升恒見文苑傳奕孝乾隆二十二年進士第三人授編修官至工部左侍郎嘗充起居注官見載筆非一人手文法參差因譏記注成規一卷爲後來者法五十一年

天子臨雍奕孝以國子祭酒講易天行健一節敷陳明暢上爲動容命兼管樂部纂律呂正義續編嗣奉

敕定詩經樂譜據文辨音據義定調一復三百篇本音於

朱載堉樂律全書多所訂正製器尤精任祭酒時和珅柄國稔其才欲羅致之不可假觀其器又不可會七載不遷官有諷之者則曰命係於天恩出自上若何能爲耶生平掌文衡最久同考典試視學凡十有三子曾蔭字勗齋南鄭巡檢以才幹稱

朱宗洛字紹川乾隆二十五年進士授天鎮知縣甫下車緝獲廣昌縣越獄積匪於西南山谷中窮治窩黨境內肅然聽訟不踰三日悉論報可息者令自和解宗洛性耿介坦白研精易學卒於官篋中惟所著周易觀玩篇及手抄書數十卷祀名官

大同府志有傳

無錫金匱縣志 卷二十一  
三  
丁尹志字襄城乾隆二十一年舉人歷官肇慶廣州知府  
歲凶議平糶上官難之尹志委曲陳告卒得請紅毛夷  
以怨劫呂宋舟於澳門內俘其眾勢洶洶尹志密白左  
翼鎮於虎門張礮整師親往登其舶諭以外夷在內地  
無得相讐夷酋懾服歸呂宋俘事遂解子瀛洲萬載知  
縣芳洲舉人番禺知縣閩洲循化同知並以廉敏稱於  
時丁氏數世友愛瀛洲之去萬載也虧款數千金芳洲  
閩洲釀金償之

王寬字栗人千仞子乾隆三十一年進士授兵部主事游  
升監察御史言事左遷出知狄道州承追二十餘年逋  
賦民力殫竭寬力請大吏得入告豁免通省積欠民勒  
碑頌其事州故楊忠愍公作尉地其祠久廢修復之調  
秦州乞養歸族弟琪字玉章以進士官兵部主事勤慎  
稱職嘉慶十九年邑大祲琪在籍董賑務定晷賑法後  
倣行之

倪鼎銓字晉階乾隆三十年舉人知渠縣適教匪滋事堵  
禦有方並擒賊首超遷知府時賊四竄焚掠鼎銓陳堅  
壁清野之策民賴以安補雅州知府旋卒

馮埭字體中乾隆三十六年進士由工部員外郎出爲青  
州知府益都報災單騎往勘設法撫卹吏不敢欺調雷

州漁戶多奸民常勾引海盜兵弁往捕輒縱盜首而略  
瀕海貧民誣爲盜以邀功塉悉心研訊莫敢誣陷弟培  
字仁寓進士厯官給事中在樞廷三十年慎密謙退蕭  
然若韋布著有鶴半巢詩稿

孫永清字宏度乾隆三十三年舉人授內閣中書尋入直  
軍機處永清性警敏諳曉時事累擢都察院左副都御  
史出爲貴州布政使擢廣西巡撫會安南阮惠逐其主  
黎惟祁破關求內附總督孫士毅遽請出師永清以不  
宜深入阻士毅士毅不聽竟敗於富良江其後惠悔罪  
投誠效職貢旣入關永清料簡護送往來瘴癘積勞成  
疾卒弟藩字振宇國子生以四庫館議敘中書科中書  
累任劇郡善治獄擢陝西督糧道以教匪不靖督辦軍  
糈著勞績終安徽布政使

秦震鈞字酉經國子生以乾隆三十二年授臨清州判逾  
年王倫反壽張震鈞適權州事預爲戒備而賊已至嬰  
城固守凡十七日賊每以大礮擊城危如累卵矢盡糧  
絕城竟得全擢臨清知州累遷浙江鹽運使以病免復  
出爲濟東泰武臨道卒於官方賊攻臨清有婦女千人  
羅拜城下乞入城副將葉信持不可震鈞曰是吾百姓  
忍棄之耶竟納之居家孝友好施與其善舉甚多

鄒炳泰字仲文祖捷諸生有學行父夢臯進士歷官戶科  
給事中巡視京城介不絕俗炳泰乾隆三十七年進士  
授編修轉司業援古禮請建辟雍尋擢內閣學士累官  
吏部尚書加太子少保協辦大學士屢掌文衡力厲清  
節人莫敢干以私囊橐蕭然澹若寒素視學江西有隸  
人子濫廁學校士羣攻之前學使斥革四人炳泰至卽  
予開復而斥隸人子士大悅服官戶部嚴核侵蝕同官  
欲變法裕國用炳泰謂是與加賦異名同實持不可乃  
止嘉慶十八年邪教林清滋事炳泰以兼尹畿輔未能  
先事覺察左遷歸歷主鄉會試所得士如李毓昌強克

捷忠義最著子光駿二品廕生歷官徽州知府有巨商  
某以三千金爲壽乞臨其喪不許清介有父風

秦瀛字凌滄乾隆三十九年順天舉人四十一年

東巡召試

賜內閣中書遷侍讀出爲浙江溫處道除永嘉數十年以  
生監充莊長積弊擢按察使平反定海難民蔡長興十  
二人之非盜甯紹台大水告饑有司預報豐收不敢請  
瀛言於巡撫得議賑調湖南衡州歲歉陝西奏撥兵米  
瀛力止之旋告歸復出按察廣東治吳鰕喜之結黨於  
順德者撫黎民之爲亂於瓊州者懲賭博之號稱白鴿

標者擢浙江布政使入爲光祿卿終刑部右侍郎瀛少負異稟操筆千言以詩古文明當世出入中外屢爲刑官治獄明慎歸而捐義塾田以課子弟修錫金縣志卒於家弟濂舉人工詩文聞父訃號慟嘔血卒沆自有傳楊揆字荔裳乾隆四十五年

南巡召試

賜內閣中書入直軍機處隨大將軍福康安征廓爾喀遷內閣侍讀授四川川北道擢按察使陞甘肅布政使調四川時教匪方渡潼河焚掠三臺中江縣境成都戒嚴總督魁倫逮問揆施設備具而師行饋餼不繼檄他州

縣預籌糗糧以資飛輓又奏請亟發餉銀二百萬兩報可以勞卒官揆少工詩文與兄芳燦並負才望居官遇事果決與軍事相終始贈太常卿芳燦見文苑傳弟英燦字蘿裳知安縣建倉以備凶荒調成都官民爭地積久不決英燦折之訟始平擢松潘同知撫蠻夷有法紀著通省蠻夷備攷卒於官

周鎬字懷西乾隆四十四年舉人知鄞縣邑有塘衛田數萬頃屢築屢圯鎬相其形勢營以石名永鎮塘邑之人尸祝之擢同知署嘉興府歲旱奉檄移粟數萬石鎬與一萬石巡撫大怒鎬曰嘉民亦乏食杭民何不糴於產

米之區而奪嘉民食乎巡撫韙之擢漳州知府上治漳  
六事行之卒於官著有犢山類稿

秦鴻升字霽峰乾隆四十五年舉人授滑縣知縣地曠民  
刁盜賊充斥鴻升治以嚴民作歌曰秦公來戶夜開嘉  
慶二年許州賊猖獗延及滑境鴻升日夜籌備民藉以  
安旋乞休歸

顧鈺字式度乾隆五十二年會試第一以庶常改部曹時  
和珅方柄國招致之鈺屏跡不往嘉慶初擢御史旋卒  
鈺性伉直遇事不阿論者多以未竟其用惜之

華枋字因培乾隆五十一年舉人知鎮海縣時浙洋多盜  
枋令沿海居人能自備盜者以名上得若干戶諸大猾  
亦在其中悉召入密室具酒食從容指實其事皆叩頭  
伏乃與約令緝盜自贖卒得其力境以安歷任什那灌  
雙流宜賓諸縣所至平反冤獄興利革弊俱有聲

秦雄濤字聲雷乾隆五十四年舉人授太湖縣訓導勸修  
學宮蒐訪邑中貧寒節孝二千餘口彙詳請旌士民頌  
之平生好究經義著有五禮輯要朱旭字漱軒雄濤同  
科舉人太平縣教諭在任日有寒峻爲勢力所抑者旭  
力扶持之俾得直以疾歸諸生建祠祀之

華瑞潢字秋槎歷知瑞安象山臨海等縣有惠政擢同知



署台州知府被議去官僑居西湖二十年大吏重其才  
事多倚辦瑞潢狀短小而膽力過人嘗行段橋見兩僧  
搏其一被按伏地呼盜瑞潢直前擒其按者果太平盜  
亡命淨慈寺爲僧者也并獲其贓以畀縣官而不尸其  
功又從巡撫吉慶勦賊甯波大風賊舸驟至瑞潢立鷁  
首手刃一賊賊發礮礮撻於桅離頂數寸不爲動慶將  
上其功辭曰如欲得官則向者獲盜可矣後巡撫阮元  
再濬西湖以瑞潢悉湖中水利俾董其役焉卒祀象山  
名宦杭人亦祀之蘇公祠側

蔣錫孫字望庭乾隆五十七年順天舉人歷知天台上虞

慈谿等縣道光二十年英夷寇海疆錫孫以積勞卒於  
慈谿邑人與將軍朱貴前知縣賴晉並祀於城外大寶  
山

蔡維鈺字其相嘉慶元年進士選庶吉士授編修改御史  
奏西洋人傳習天主教多不法宜諭禁又稱江浙米價  
騰貴聞有私出海洋情弊宜飭督撫嚴查又參劾廣東  
林五一案交總督審辦久不奏報宜令刑部嚴立期限  
皆報可維鈺少受學於秦瀛砥礪名節爲言官思有所  
建白年未及艾而卒

寶廷模字立範由舉人授江浦教諭江浦毘連六合暴雨

山水盛漲圩田皆爲巨浸廷模請開支河以疏洩之上  
官令董其役水患遂息又捐建同善堂節孝祠邑人德  
之祀名宦從弟廷柄以玉田主簿署縣事居官廉介時  
北河久不治作二十四大河口號復繕治河方略圖說  
由大府上之會教匪倡亂隨營辦事恒獨騎窮巖絕壑  
間圖要害以獻以憂歸

侯昉字勤補乾隆五十九年舉人任五河教諭修葺學宮  
歲祲勘賑心力交盡卒於官祀名宦族兄雲濤字漢翔  
舉人任全椒訓導亦以勘賑爲民所戴著有北譙吟草  
薛凝度字帖亭嘉慶六年進士由中書出爲雲霄同知建

城垣修學校署漳州知府劾罷不職者二員調興化鋤  
梗安良士民著甘棠雅詠頌之與前知府薛梅洋並祀  
爲二薛公祠

孫爾準字平叔永清子嘉慶十年進士由編修出知汀州  
府甯化民斂錢拜會大府將治以叛逆爾準訊悉其狀  
誅其首無株連遷福建鹽法道累擢布政使巡撫安徽  
平河南竄入邪黨旋授浙閩總督會彰化賊械鬪附近  
蠶起全臺震動爾準先遣將遏之而親帥兵渡洋臺民  
惶懼爾準首誅盜六人以徇奏請焚殺有據者始坐辟  
餘從未減其附從而卽解散者置弗問數日間人心大

定保全無算時議調兵協助又奏止之爾準宅心平恕  
學問淹貫兼善詩詞雖兵事倥偬誦讀勿輟恂恂如書  
生所至必咨訪疾苦前後修舉水利成膏腴數萬頃以  
瘁卒官贈太子太師諡文靖

俞肯堂初名坊字人表嘉慶十四年以內閣中書中進士  
由編修擢御史二十四年河南大水疏請以工代賑報  
可豫民是歲無流亡肯堂慷慨好任事嘗偕編修劉嗣  
綰主事徐煥副指揮繆其泰創建錫金會館於都門肯  
堂尋卒內閣典籍華文榕署正施普主其事經營又十  
餘年其泰性豪邁初謀作會館費鉅萬計其泰貸金書

券而鳩助於邑之仕中外者事以成後官平陽通判

秦琳初名琦字漆漁嘉慶九年順天舉人知范縣會敘匪  
李文成滋事東明長垣間寇盜充斥邑戒嚴琳籌畫儲  
備夜宿堞樓匝月不解帶武弁藉端需索琳裁抑之聞  
母訃代者未至琳寢苦從事卒賴安堵工詩文有漆漁  
詩稿

秦沆字小泗四庫館議敘得新淦縣丞擢知臨川縣興學  
校鋤豪強修城築隄養老育嬰埋齒拯溺十餘年民情  
大洽時江西鹽引缺銷沆請平鹽價減加引裕販本遷  
南昌同知監寶昌錢局知錢法之壞由料價不敷而侵

蝕者眾乞貸庫錢生息津貼罷冗役陋規議皆得行擢

永平知府嚴絕所屬供億瀕海多荒地乃召民墾禁索

費成田無算沉性仁恕而勇於任事尤善折獄祀臨川

名宦臨川縣志有傳子國楠舉人工詩文居父喪哀毀尋卒

秦鳳梁字琴山嘉慶九年舉人攝雲州知州民人楊紅為

捕役所殺府委通判代驗通判與吏目有親賄紅妻以

火葬滅跡鳳梁發其奸補浪穹知縣引疾歸嘗為同考

官得知名士五人主試林則徐為繪五芝圖記其事

蔡培字蓉塘嘉慶十四年進士由庶常改甯晉知縣歲大

旱培方詳請秋賑時京師有林清之亂軍書旁午請發

庫銀僱車以應兵差民得不擾又密獲西境逆黨二十

五人頭目二人置諸法境乃安調高邑邑多猾胥培至

嚴約束釋株累以憂歸再任文登卒於官

廉志勲字雲階嘉慶十八年拔貢生為兵部七品小京官

旋中二十三年舉人性端謹處事詳審嘗館大學士英

和家甚見器重無一言及私工小楷累遷職方郎中

華希高字退庵歷知浮梁豐城等縣豐城地窪下水恒漂

沒人田廬希高築隄捍之工鉅而費博自是邑無水患

卒於官竟以虧帑籍其家民建祠祀焉

楊德墳字伯吹諸生歷知宣城博羅歸善新會等縣從湖

廣總督盧坤征猺有功及坤移督兩廣又檄治韶州會  
匪擢佛山同知未任卒其在博羅仿南河碎石工築海  
隄以遏潮衝歸善爛崽病民德墳按治如律新會瀕海  
多盜乃添設巡卡廣募民船游緝洋面以安嘗偕族人  
建先祖忠襄公祠於惠山又捐田以贍族

杜紹祁字少京嘉慶二十五年進士署仙游知縣補鳳山  
貢生曾高飛故巨猾與富室爭墳山厯數令不決紹祁  
核積牘得高飛最初券年月不符猝詰之辭服署臺防  
同知未幾鳳山奸民王曾楊良斌煽亂檄紹祁兼署鳳  
山馳至赦脅從收反側賊漸解散擒曾良斌誅之有歐

和尚者聚眾謀不逞紹祁密購線揚言詣府出不意擒  
之其黨遮道將劫奪紹祁命斬和尚竿其首眾駭逸餘  
盜亦次第平邑大治又以鳳山城陋無形勢可扼乃建  
復舊城於龜山之麓紹祁捐廉爲之倡擢淡水同知引  
疾歸建宗祠恤族嫠而依其昏嫁喪葬者主講東林所  
入修脯時以周士類佐賓興焉咸豐三年寇警邑人多  
徙避子友李友房以請紹祁咄曰吾嘗從大夫後且忝  
諸生一日長奚避爲卒年七十六友李友房皆有學行  
華端翼字鳳威道光三年進士知靈壽縣持身廉介以陸  
清獻嘗宰是邑慕而法之其同年進士秦大治官武強

知縣劉承本官金鄉知縣並工制舉文大治居官戇直  
忤上官歸主講東林又陶沅與大治同舉于鄉以進士  
知安化縣改池州教授亦善制舉文

秦細武字省吾瀛子少能文善學窠書以國子生歷任江  
西知縣而蒞彭澤者再彭澤多豪猾難治細武杜請謁  
精聽斷吏莫能爲奸數平反冤獄他邑有疑案輒委決  
焉其再任時邑多逋賦又累被水前令多以奏銷處分  
去無得久任者細武至不事敲扑開誠諭之民戴前惠  
慮其去爲揭帖于市曰願秦父留者輸無後咸踴躍自  
災緩外輸如額而贏馬當鎮界湖北安徽其閣排洲爲

盜藪細武夜馳往盜不及越界獲其魁大吏才之使禁  
督贛南會匪細武曰其會名千刀人眾難盡捕惟先得  
者不惜盡法懲庶未得者聳懼又上便宜四事行之以  
烈日中捕蝗得疾卒無以斂縣人歸其喪

彭澤縣志有傳

華雲陞字味根道光二年舉人歷知崇安仙游長泰等縣  
在崇安卻茶商陋規仙游民好訟嘗一日夜清積案三  
十餘勸戒並施訟爲之衰長泰瀕海民風獷悍雲陞禁  
械鬪濬城隍廉明大著每去任攀轅祖送者載道卒于  
官囊橐蕭然子鏡宇附貢生能書畫

侯之翰字蘭臺昉子實錄館議敘縣丞署曲江縣事累以

獲盜功擢知陽春東莞縣南澳同知在陽春興書院治  
水災修城垣在東莞士人作詩頌其清德祀曲江東莞  
名宦

蔣大鏞字和叔道光二十四年進士咸豐初知雄縣會粵  
寇擾畿輔軍書旁午事辦而民不知調知通州繕城隍  
嚴防守寇不敢偪

上才之召諭大臣近畿防務宜法通州擢順天府治中嚴  
絕請謁忌者或中以蜚語坐落職尋事白復官選奉天  
府治中奉天與旗員錯治政令歧出貨賂公行皆削厓  
岸相容隱大鏞獨柴立一切裁以法度大著清望旋隨

大臣勘事吉林吉林將軍等先以庫金寄市權子母至  
此事覺大臣至欲閱庫大鏞曰急則將軍以下罪皆死  
而金不及還庫請緩三日庫金八十萬可盡歸也從之  
果如其言將軍以下得減罪論成皆感激出金爲贖大  
鏞却之曰吾爲國家計耳敢有私哉復隨大臣赴高麗  
議邊界操紙筆五問五答卒屈高麗俾讓甌脫地博六  
十里表三千里卒于官同僚集賻歸其喪

程應庚字文泉諸生以縣丞擢陽穀知縣有女尸驗係被  
勒事無端倪應庚檢得手帕設法鈎距罪人斯得署壽  
張有父母匿女而以重情控夫家者應庚密購獲其女

誣遂白尤善治盜以瘁卒官

周建勳字臣哉世襲雲騎尉署太倉劉河營都司咸豐三年土匪周立春等據嘉定攻太倉東門建勳與知州蔡映斗悉力拒守鎗斃數十人賊眾敗走建勳待士卒有

恩信人樂為盡力

見太倉州志

朱厚基字子山咸豐十年進士授兵部主事未補官出為湖北試用道旋卒王緯字莘鋤同治二年進士由庶常改戶部主事緯文名噪都下一時問業者甚眾光緒二年典福建試尋丁母憂亦卒二人在部以勤敏稱尤篤鄉誼有以緩急告靡弗應皆未滿五十卒鄉里惜之



無錫金匱縣志卷二終

